


PAULI CORTESII
DE HOMINIBUS DOCTIS
DIALOGUS.





PAULI CORTESII

VIRI CLARISSIMI

DE HOMINIBUS DOCTIS

DIALOGUS

NUNC PRIMUM IN LUCEM EDITUS

CUM ADNOTATIONIBUS.

ACCEDIT AUCTORIS VITA:

AD ILLUSTRISS. DOM. MARCHIONEM ABBATEM

GABRIELEM

RICCARDIUM


PATRICIUM FLORENTINUM.



FLORENTIÆ. MDCCXXXIV.

Apud BERNARDUM PAPERINUM, sub Signo Palladis, & Herculis.

CUM APPROBATIONE.



GABRIELI RICCARDIO
PATRICIO FLORENTINO
MARCHIONI.

BERNARDUS PAPERINIUS.



ABUIT *superior etas*
Viros planè doctos,
omnibusque ingenuis artibus erudi-
tos, per quos potissimum renata lit-
teræ,

DEDICATIO.

teræ, ac restituta fuerunt. Dialogum de iis scripserat Vir temporum suorum elegantissimus, idemque acerrimo iudicio præditus, Paullus Cortesius, & De Viris Doctis inscripserat. Hunc mihi Dialogum quum typis meis imprimendum liberaliter concessisset Alexander Politus V. Cl. qui eum sibi ex Sangeminianensibus membranis jam dudum describendum curaverat; tu mihi statim occurristi, GABRIEL RICCARDI, Vir amplissime, atque ornatissime, cujus Nomine idem hic Dialogus inscriberetur. Nam & doctus ipse es, quàm qui est maximè, & doctos Viros amas, & de iis acerrimè iudicas, & doctrinas omnes liberalissimè protegis, ac promoves. Quumque Tibi Deus, ac FAMILIÆ
TUÆ

DEDICATIO.

TUÆ opes tantas , quantas alteri cuiquam vel locupletissimorum privata conditionis , ac fortunæ hominum ; tribuerit ; eas sanè non ; ut plerique faciunt , ad luxum , neque ad voluptates , refers ; Sed , quod paucissimorum est ,

. quos æquus amavit
Juppiter , atque ardens evexit
ad æthera virtus ;

maximas Tuas divitias in doctos homines ornandos , doctrinasque ipsas amplificandas impendis . Neque in summâ rerum omnium affluentia quidquam te magis afficit , atque oblectat , quàm libri cujuscumque generis , & doctrinæ , quos pulcherrimum esse ducis , atque optimum amplissimi patri-

DEDICATIO.

monii tui ornamentum. Idque præcipuè est, quod, præ generis nobilitate, divitiarumque gloriâ, in Te omnes mirantur, studium erga litteras, atque homines litteratos. Quare est omnino, GABRIEL amplissime, quòd sperem, munusculum hoc meum Tibi esse perplaciturum, quod ad doctos homines pertinet. Qualecumque id est, lubens Tibi ac meritò offero. Favor si mihi Tuus præsens adsit, incumbere in eam curam alacriter pergam, ut pleraque alia doctorum Virorum monumenta ad publicam studiosorum hominum utilitatem edantur. Vale.



PAU-



PAULI CORTESII V I T A.



AULUS e nobili CORTESIORUM Familia, ¹ quæ inter primarias Sancti Geminiani Etruriæ Oppidi est habita, antiquitus ex Ticino Insu-briæ Urbe oriunda, Romæ ² anno humanæ reparationis MCCCCLXV. ortus est, patre Antonio Cortesio, qui feminam patriciam N. Aldobrandiniam Florentinam in matrimonio habuit,



buit,

¹ Jo: Vinc. Coppi in Chron. Gemin. impress. Flor. 1695. Paulus ipse Municipis suos appellat Cherubinum Quarqualium Geminianensem in Lib. 2. de Card.

ac Antonium Lollium pag. 53. hujus Dialogi.

² Idem Copp. l. d.

buit, quique ¹ Duodecemvirum Compendiariorum, ac ² Scripturariæ Censuræ princeps fuit; Vir quidem honoris, fortunæ, & virtutis ornamentis præditus, ac ³ Libelli cujusdam Institutionum Moralium Scriptor. Pauli fratres fuere ⁴ Alexander Latinis Musis clarus, cujus Carmina non semel formis ante excusa, novissime illustrium Poëtarum Italarum poematis inserta Florentiæ prodire; & ⁵ Lactantius Eques, Paraphraseos in Cæsaris Commentaria author, ipsique Paulo superstes, qui inchoatam a fratre Operis de Cardinalatu editionem, eo vita functo, absolvit.

Hic a teneris, ut ajunt, unguiculis optimarum artium studiis addictus, acre ingenium ita excoluit assiduis lucubrationibus, tantumque in omni genere litterarum profecit, ut non solum ⁶ Philippo Callimacho,

Pom-

¹ Cortes. de Card. in proem. Vulgo *Protofraternario* juxta Copp. sentent.

² *Correttore delle Contraddette* idem Copp.

³ Extat in Biblioth. Lecceti, de quo Cinellius in Scriptor.

⁴ (Ab aliquibus T. *Alexander*) A Diplomataribus Centumvir, idest *Segretario Apostolico*, ac Libellionum Triumvir, *Segretario de' Brevi* appellatur a Coppio, qui subdit eum Nuncium Apostolicum

fuisse, diemque suum an. 1404. ætatis 30. obiisse. Plura Voss. de Hist. Lat. l. 3. & Janus Douza a Voss. citat. Jo: Cinell. de Scriptor. Etruscis Alexandro, & Paulo Fratri unum idemque Opus ascribit deceptus ab elogio Jac. Gaddii, quod ambos fratres complectitur.

⁵ Magdalenam Medicæ uxorem duxit. Copp. in Chron.

⁶ Copp. l. d.

Pomponio Læto, Angeloque Politiano clarissimis Viris ob studiorum similitudinem, necessitudine jungeretur, verum etiam cum Raphaële Volaterrano, Pico Mirandulano, Hermolao Barbaro, Marsilio Ficino, ac Bartholomæo Lampridio, qui ejus doctrina, ac judicio utebantur, familiarissime viveret. Summam Principum gratiam, & benevolentiam virtutis, atque doctrinæ commendatione sibi comparavit; id, quod de se significat: *1 Puer Romæ cum ab Alexandro fratre deducerer ad Principes, sæpeque honoris causa in convictum adhiberer, &c.* Nam *2* & purpuratis Patribus, ipsisque adeo Summis Pontificibus, præcipue vero Pio III. ac Julio II. cui Liberum paullo ante memoratum de Cardinalatu dicari voluit, fuit acceptissimus. Quod Opus ad Viri Principis in unaquaque deinceps ætate studia dirigenda a se primò conscriptum, *3* Ascanio Cardinale Sfortia hortatore, non paucis immutatis de Cardinalatu postea nuncupavit. Hinc est quod Guillelmus



Ca-

1 De Cardin. lib. 3. pag. 190.

2 Ex Epist. Cosmæ Pæstii Archiep. Flor. apud Copp.

3 Copp. in Chron. pag. 71. Vincent. Placent. in Epist.

Caveus duplex opus de Principe, ac de Cardinalatu Paulo adscribit. Non me latet ¹ Gabrielem Naudeum Parisinum, librum hunc censura notasse, quum diceret, cum *sua mole difficulter regi, licet Ciceronianæ dictionis adjutum præsidio*. At vero longe aliter de eo Libro doctissimi Viri ² Jacobus Gaddius, ³ Vincentiusque Mainardus sensêre. Primus enim fatetur hoc opus *omnigenæ fere doctrinæ, ac eruditionis peramœna varietate contextum*; alter: *Non barbarica asperitate vastum, aut oratione jejuna salebrosum, sed Græca ubertate, & Romana gravitate magnum*. Nec minus honorificum de eo opere, ejusque Authore testimonium ⁴ Raphaël Volaterranus dixit: *Res, inquit, multa cogitatione quæsitæ, sæpeque duras cultu orationis, latinitateque mollebat; cujus ei tanta religio fuit, ut sententias, inventaque perire mallet, quam non apte, ornateque exire*. Stili vero elegantiam, cujus fuit admodum studiosus Cortesius, a ⁵ Severo Placcen-

¹ Naudeus in Bibliographia Polit. impress. Lugd. Bat. 1641. pag. 177.

² Jac. Gadd. in Coron. Elogiast. ac de Scriptor. non Eccles. pag. 141.

³ Vinc. Mainard. Geminian. Ord.

Prædic. in Epist. Laet. Cortesio.

⁴ In Epist. nuncupat. ad Jul. II. præfixa Operi de Cardin.

⁵ In Epist. Laetantio Cort. Lib. de Cardin. præfixa.

centino magnopere commendatam ex quadam ejus Epistola intelligimus: *Hic a primis adolescentiæ annis maximo animi ardore ad imitanda Ciceronis vestigia, & ad priscum illius ævi eloquium instaurandum semper aspiravit . Qua in re quantum profecerit, facile colligi potest, cum ex multis ejus lucubrationibus, tum ex Epistola, quam ad Politianum scripsit cum eo de Ciceronis imitatione contendens ætate quidem adhuc juvenis, at judicio maturus, & senex. Verba Epistolæ hæc sunt: Quare, ut de me loquar, nihil est, Politiane, quod me a Ciceronis imitatione deterreas, sed quod potius objurges inscitiam, quum nequeam bene illum imitari, quamquam ego malo esse aspecta, & simia Ciceronis, quam alumnus, aut filius aliorum, &c. Hæc exstat inter illustrium Virorum Epistolas a Politiano partim scriptas, partim collectas, Lib. VIII. Ep. XVII. * Antonius autem Possevinus Paulum inter Scriptores Theologicos numerat inquiens: Paulus Cortesius Protonotarius Apostolicus quatuor Libros Sententiarum exposuit, * de quibus quidem*

10-

α Tom. 3.

β Idipsum testatus est Gaddius l. d.

loquitur * Jodocus Badius Ascensius rei typographicae locupletator maximus, ubi Opus Cortesii Theologicum nos habere monuit. Luculentius vero * Guillelmus Cave memoratus, qui ait: *Paulus Cortesius scripsit in quatuor Libros Sententiarum disputationes scorsim editas Parisiis 1513. fol. ac nonnullis Hieronymi Savonarolæ Opusculis conjunctas, Basileæ 1540. fol.* quibus addidit ejusdem Cortesii Opus, cui titulus: *De Sacrarum litterarum, omniumque disciplinarum Scientia, Basileæ impressum apud Henricum Petri*; de qua quidem re penes eum fidem esse volo. Ob hæc, ³ aliaque hujusmodi ingenii monumenta, non minus quam ob morum candorem, atque integritatem quum vulgo esset etiam absentibus notus, Romæ claruit, atque in Pontificatu Alexandri VI. & Pii III. Munus obiit Secretarii Apostolici; Protonotarius Apostolicus deinde ex numero Participantium creatus; denique ⁴ Episcopus Urbinas electus est, eo opina-

* In schol. Epist. XVI. Lib. VIII. Epist. a Polit. collect.

² Hic Paulum claruisse scribit an. 1500.

³ Inter ea numeratur Historia, seu

Fabellæ Hyppoliti, & Dejaniræ Lat. sermone, quæ extat MS. apud Cl. Salvinum, ab Episcopo Signino laudata.

⁴ Copp. in Chron.

pinamur tempore, quo ¹ Gabriel de Gabrielibus Urbini Antistes Umbriæ legatione fungebatur. Decipitur ² Naudeus, qui Paulum in Purpuratorum cœtum adnumeratum fuisse ratus est, & merito ab ³ Hyacintho Coppio reprehenditur; sed facile ille amplissimam dignitatem consequutus esset, nisi ⁴ mors immatura anno MDX. ætatis suæ quadragesimo quinto in Castro suo Cortesiano spem ejus rei omnem ademisset. In cujus obitu hæc, qualiacunque sunt, prodire ⁵ epitaphia:

*Quid juvat exulto versu decorare sepulchrum,
Debita cum fuerint justa soluta minus?*

*Desinite ingenio sic, o certare Poëtæ,
Non numeris opus est, crebro litate magis.*

TUMULUS.

*Quid quæris? Paulum. Paulum quæ tota parentem
Dicebat nuper Lingua Latina suum?*

*Perge aliò; tantum sunt ossa hic putrida, compos
Mens voti Elysios viva pererrat agros.*

EPI-

¹ V. Ughell. Ital. Sac. T. 2.

² In Bibl. præd. pag. 177.

³ In Ep. Chron. inserta Jo: Vinc. filii.

⁴ Copp. in Chron.

⁵ Extant apud Copp.

EPITAPHIUM.

*An Patriam, Gentem, Nomen vis? Geminianum,
Cortesium, Paulum, nosti? ea crede, sat est.*

Ita Michaël Margatti; at * Severus Placentinus:

*Eloquii gravitas, & sacri jura Senatus,
Cortesi, sita sunt hic, ubi, Paule, jaces.*

Jacobi denique Gaddii Elogium Oratorium obvium est in Coronide Elogiastica ejusdem, ac ubi agit * de Scriptoribus non Ecclesiasticis Græcis, Latinis, ac Italicis. Pauli interitu ingentem fuisse calamitatem litteris importatam Litterati homines conquesti sunt. Is enim Historiæ, Philosophiæ, ac Theologiæ, quas facultates apprime callebat, lucem, ac dignitatem ingenio, atque eloquentia, si diutius vixisset, & extremam, quod ajunt, operibus manum admovisset, fuerat allaturus. Vir animo ab omni dolo penitus alieno, ætatem non desidia, aut voluptate, neque vero in augendis fortunis, sed in litteris colendis studiisque traduxit. Hujus rei præ ceteris argu-
men-

* Apud Copp. & Placent. in Epist. | a T. I. pag. 141.

mento sit Montana Villa, Cortesianum oppidum appellata a S. Geminiani duobus passuum millibus distans, in quam ipse res urbanas aulicasque pertæsus sub exitum vitæ secesserat, quam in arcis modum redactam amœnissimam fecerat, ubi dulce Musarum diversorium instituit, quo ¹ principes Viri quamplurimi se conferre consueverant; inter quos spectatissimæ prudentiæ senex ille Hercules II. Ferrariæ Dux, Guidus Ubaldus Dux Urbinas, Alexander Farnesius (postea Paullus III. P. M.) & Franciscus Soderinius Cardinales studio visendi hominis, qui negociorum peritia, rerum aulicarum, politiæque usu, necnon iudicii maturitate oraculum haberetur. ² Verba hic referre liceat, quæ ipse in Cortesiano Castro ultimis vitæ mensibus scripsit, dum opus sæpe memoratum absolvere festinabat, mercede illuc conducto Simeone Nicolai Nardi Senensi Typographo, ut is ibidem illud prelo subjiceret, a quo deinde ³ publici juris factum est xv. Novembris ejusdem anni MDX. *Quod quidem cum multis in locis, tum maximè his proximis tribus annis in Cortesiano*



no-

¹ Copp. l. d.² Lib. 3. de Cardin. pag. 229.³ Editio hæc in Castro Cortesiano facta, rara est.

novi; quo cum incredibilis litteratorum multitudo visendi mei causa ex Italia cuncta venisset, ac semper fere inter nos de rerum maximarum studiis legitimus institueretur sermo, saepe inter loquendum, & disputandum sensi multos ob id huic opinationi assentiri velle, &c. Dialogum, quem nunc in publicam lucem emittimus, primo ætatis suæ flore elucubravit, circa annum scilicet mccccxc. quod sane colligitur ex iis, quæ leviter attingemus. Mentio habetur inibi Antonii Geraldini Amerini, veluti vita functi, his verbis: *facile homo litteris instructus, si longior ei vita contigisset, a Rege generoso, ac potente, & opibus, & honoribus sublevaretur*. Constat vero ex Itinerario Alexandri Geraldini fratris, atque ex Jacobilli¹ Bibliotheca, Antonium diem suum obiisse anno mccccclxxxviii. Scribitur autem Dialogus a Paulo adhuc adolescente, de quo dici possit² *inesse Operi quandam super istius ætatis captum quasi maturitatem*, ut ait Politianus; eo vero tempore annum agebat noster vigesimum quintum. Dicatur denique Dialogus Laurentio Mediceo, qui fato cessit ineunte an-

no

¹ Bibl. Umbr.

² In Epil. quadam a Polit. scripta,

| quam in calce referemus.

no MCCCCXCII. Ceterum censura instituitur plurimorum Scriptorum a restitutione litterarum Latinarum ad ea usque tempora fere omnium vita fundorum, ut patet ex verbis ipsis Dialogi pag. 55. *Præclare intelligo, cur neminem ex his, qui hodie sunt, velis ipse nominare. Quare nil mirum sit, inibi de Marsilio Ficino, Angeloque Politiano, quem pag. 48. Dialogi amicum vocat, patriæ nostræ luminibus, ne verbum quidem legi. In Epistola Cortesii nuncupatoria ad Laurentium Virum magnanimum hæc habentur: Quum sæpe in mentionem incidissem eorum hominum, qui nobis studia doctrinæ ab interitu vindicarunt, dolebam equidem quum a nobis multum summis ingeniis deberetur, nos esse ad remunerandum tardiores. Itaque cum multis sæpe in locis, tum maxime nuper in Insula, quæ est in lacu Volsiniensi (Farnesiæ Domus fundo, de quo vide ejusdem Dialogi pag. 2.) eorum est habita mentio. Nam quum ex Urbe aliquot adolescentes in Insulam venissemus, essetque nobiscum Alexander Farnesius, adolescens cum ingenuis artibus instructus, tum summa mecum benevolentia conjunctus, cepimus ibi sedentes inter nos colloqui multis variisque*

*de rebus propter loci amœnitatem. Quumque quæ-
reretur quinam essent hi, quorum ingeniis sunt
sopita studia excitata, rogavimus omnes Anto-
nium quendam majorem natu, doctissimum qui-
dem illum hominem, & ingenii acerrimi, ut si
ei placeret, quid de his viris sentiret, explica-
ret; quod quum ipse multa de unoquoque proprie
gravissimeque differuisset, collegissetque eos ho-
mines uno sermone usque ad hanc ætatem, tan-
tum me illa vel copia, vel illo orationis cursu
delectavit, ut decreverim eum ipsum sermonem
mandare litteris. Hinc desumuntur Authoris
de hoc Dialogo edendo consilium, occasio,
locus, tempus, personæ denique, nempe Pau-
lus Cortesius, & Alexander Farnesius adole-
scentes, atque Antonius quidam Vir grandæ-
vus, & doctus, de quo nihil mihi est adhuc
exploratum. Perraro citatur hic Dialogus,
a ¹ Gaddio aliisque omissus: nec mirum; ad
hæc enim ferme tempora latuit. Laudatur
tamen inter recentiores ab eruditissimo Jo-
hanne Vincentio Coppi (penes quem auto-
graphum extitit) in Chronicis Geminianen-
sibus; atque a Cl. Viro nominisque fama ce-
leberrimo Apostolo Zeno in suis Additionibus.*

ad

ad Vossium editis inter Ephemerides Litteratorum Italiae . At vero multo ante meminerat Lucius Fazinius Maphæjus Episcopus Signinus, Vir, ¹ Ughellio teste, doctrina clarus, peritiaque tum Græcæ, tum Latinæ Linguae percelebris, qui de eo ita ad Cortesium scripsit:

L. M. PHOSPHORUS PONTIFEX SIGNINUS

PAULO CORTESIO S.

Dli, Deæque, quid ego video? Quotus enim quisque est, qui alterum tantum exhibeat, aut præstet? Legi igitur tuum Dialogum elegantissimum, ac planè Latinum. Apparet te in legendo Cicerone operam non amisisse, ita eum effusisti. ipsum certè audire videor. Sed isto in libro id præcipuè sum admiratus, quòd in iudicandis nostrorum hominum ingeniis tam æquus fuisti. Nullis nec odiis, nec amicitiiis motus, omnes vel laudas, vel taxas; aliquos ita certis, & veris exceptionibus describens, ut ne ipsi quidem negaturi sint, si reviviscerent. Quare, mi suavissime Paule, perge, & ede Opus: nihil est, quod vereare. Ausim affirmare, si quid ego sum, omnes istos, quos commemorasti, facile a te uno in dicendo superatos.

Præ-

Præclarum etiam extat de eodem Dialogo Angeli Politiani iudicium, quod privatis litteris ad Cortesium datis consignavit; quas, quod nemo ad hanc diem, ut item superiores Fazinii, ediderit, libuit extremo hoc loco attexere, eo quia hujus Dialogi apographo præfixas invenimus.

ANGELUS POLITIANUS

PAULO CORTESIO SALUTEM.

Quid de tuo sentiam Dialogo, vix audeo quidem sine cunctatione proferre. Nam nec invidiæ objicere Amicum, nec dissimulare tamen iudicium volo. Sed tamen aut amore labor, aut libello tuo nobilior est indoles, quàm quæ videri continuo temporum possit. Censuram sic agis Litteratorum, ut, quod est arduum, candorem pariter tuum probes, & libertatem. Certè inest Operi quædam super istius ætatis captum quasi maturitas: illa verò tempestiva, non præcox. Stili quoque voluntas apparet optima, &, ut auguror, a summo non diutiùs absutura. Postremò, ut semel dicam, Phosphori sententiæ non accedo solum, sed & faveo. Tuae deinceps erunt partes, ut quàm modestè gloriam, tam fortiter invidiam feras. Vale.

IN-



I N D E X

DOCTORUM VIRORUM,

QUORUM MENTIO IN OPERE HABETUR.



- A**lexander Cortesius. *Pagina* 44.
 Ambrosius Camaldulensis 17.
 Andreas Brentius 50.
 Andreas Contrarius 48.
 Angelus Politianus 48.
 Angelus Sabinus 48.
 Antonius Campanus 37.
 Antonius Cortesius 47.
 Antonius Girardinus 51.
 Antonius Lollius 53.
 Antonius Luscus 26.
 Antonius Panormita 28.
 Antonius Tudertinus 31.
 Campaninus Septimulejus 46.
 Carolus Arretinus 19.
 Cherubinus Quarqualius 53.
 Christophorus Persona 29.
 Cola Montanus 50.
 Coluccius Salutatus 9.
 Daniel Francinus 52.
 Dantes Aligherius 6.
 Dominicus de Dominicis 36.
 Domitius Calderinus 40.
 Donatus Acciajolus 43.
 Emmanuel Chrysoloras 5.
 Bartholomæus Faccius 30.
 Bartholomæus Lampridius 52.
 Bartholomæus Platina 44.
 Benedictus Accolti 22.
 Bernardus Justinianus 54.
 Bessarion Trapezuntius 42.
 Boninus Mombricius 49.
 Flavius Blondus 31.
 Flavius Pantagathus 51.
 Franciscus Accolti 53.
 Franciscus Barbarus 20.
 Franciscus Lippus 48.

Gaspa-

Gasparinus Veronenſis , vel Per-
gamenſis 26.

Georgius Merula 30.

Georgius Trapezuntius 25.

Gregorius Tiphernas 30.

Guarinus Veronenſis 13.

Hermolaus Barbarus 20.

Jacobus Ammannatus 45.

Jannoſtius Manettus 21.

Janus Pannonius . v. Johannes Pan-
nonius.

Johannes Andreas Alerienſis 36.

Johannes Argyropylus 42.

Johannes Aurifpa 15.

Johannes Baſinius 36.

Johannes Boccaccius 8.

Johannes Jovianus Pontanus 34.

Johannes Pannonius 47.

Johannes Ravennas 9.

Johannes Tortelius 19.

Julius Pomponius Lætus 16.

Lapus a Caſtillionchio 30.

Laurentius Bonincontrius 54.

Laurentius Valla 27.

L. Carbo 54.

Leo Baptiſta Albertus 21.

Leonardus Arretinus 9. 55.

Leonardus Datus 30.

Leonardus Juſtinianus 18.

Lucius Fazinius Maphæjus 44.

Mambrinus Roſens 49.

Mapheus Vegius 16.

Marius Philelphus 33.

Martinus Phileticus 52.

Matthæus Palmerius 43.

Nicolaus Niccolus 14.

Nicolaus Perottus 39.

Nicolaus Quintus Summus Ponti-
fex 19.

Nicolaus Saguntinus 15.

Nicolaus Valla 46.

Omnibonus Leonicens 27.

Pætonus 54.

Pallas Stroza 21.

Paulus Marſus 50.

Petrus Candidus 15.

Petrus Montopolita 30.

Petrus Nucetus 29.

Petrus Paulus Vergerius 15.

Pius Secundus Pontifex Maxi-
mus 35.

Poggius Bracciolinus 22. 55.

Porcellus Neapolitanus 33.

Rinuccius Theſſalus 29.

Robertus Vulturius 36.

Sigifmundus Malateſta 34.

Theodorus Gaza 40. 55.

Victorinus Feltrenſis 26.

Xenophon Philelphus 33.

Xicco Polentonius 16.





PAULUS CORTESIUS
LAURENTIO MEDICI
S. P. D.



Um maximis in rebus, Magne Laurenti, nostrorum hominum præclara ingenia soleo laudare; tum præsertim in his studiis, quæ ex tenebris tanquam ad intuendam lucem revocarunt. Nam quum esset aliquando ex diuturna barbarorum vexatione Italia liberata; tum incredibilis multitudo se contulit ad omnium magnarum artium disciplinas celebrandas. Quorum studiis Principes illius ætatis tantum ad facultatem perquirendæ doctrinæ profuerunt, ut pariter desertarum disciplinarum patrocinium suscepisse viderentur. Quo in genere

✱††

Avus,

Avus, & Pater tuus, sapientissimi homines, extiterunt, qui quum florent omnibus virtutibus, hac in laude ingeniorum excitandorum longè ceteris præstiterunt. Tu vero hujus gloriæ præclarus amplificator, non modò extollis ingeniosorum hominum studia, sed etiam in maximis occupationibus omne domesticum tempus ad artes elegantes, atque ingenuas confers. Et quum ad naturam eximiam gravissimarum disciplinarum instrumenta adhibueris, conjunxerisque difficillimam societatem potestatis, & sapientiæ; mirabile sit dictu, quantum inter clarissimos homines unus excellas. Nam, quum primâ ætate Respublica se tibi commisset, tuque eam sic constituis, ut & omnium saluti consuleres, & eam ex flammâ civilis belli, atque ex acerbissimâ calamitate eriperes: quumque ille casus satis locuples fuisset, vel sponsor rectæ voluntatis, vel testis clementiæ tuæ; haud tamen erat satis cognitum, plusne tibi ad salutem virtus, an fortuna contulisset. Nunc verò quum tot jam annos, & his temporum asperitatibus non modò Rempublicam conservaveris, sed etiam ejus imperii fines dilataveris; nemini dubium est, te ad
hæc

hæc administranda plus a virtute, quàm a fortunâ, quæsisse præsidii. Jam vero quo unquam in homine tam diversæ inter se fuerunt partes virtutum maximarum? Quid enim longius abest, quàm a gravitate facilitas? Quis tamen te constantior? contra verò quis clementior, aut lenior? Quid tam mirabile, quàm magnitudinem istam animi humanitatis condimentis temperari? Quid est difficilius, quàm in tantâ nominis celebritate, & gloriæ ita modeste, ac temperate vivere? Æquum est, ut quum secundis prudenter modereris, & fortissimè tuleris adversas, omnem superes consilio fortunam. In quo par laus est, illius a te victæ, tua receptæ. Magna hæc quidem: sed tamen sunt & alia his fortasse non minora. Nam cum hæc bene vivendi ratio disciplinarum adjumentis confirmatur; tum nescio quid excellens, ac perfectum fieri videmus. Habes enim plurimas artes harum virtutum comites, ac ministras; quæ quum sint specie dissimiles, prudentiâ tamen eas ad omnem usum, & ad vitæ jucunditatem conjunxisti. Quis unquam te in dicendo gravior habitus est, aut in omni sermone sapientior? Jam

Poëmata tua, quod lumen ingenii, quæ ornamenta non habent? Quid dicam, quantum in Musicis, quantum in Mathematicis, quantum in Philosophiâ profeceris? Itaque solus his virtutum præsiidiis, & isto tuo mirifico sapientiæ bono, veræ gloriæ gustum sentis. Ergo ex omni Italia te unum homines intuentur; te ita verissimis laudibus ad omnem memoriam commendant, ut nulla unquam sit tuum nomen obscuratura ætas. Et præclarè cum illis actum, qui te commendando in societatem gloriæ venire coguntur. Ego verò quum ab ineunte ætate unâ omnium voce laudes viderem celebrari tuas: jamque adolescens admirabili famâ compulsus, vehementer flagrarem, signum aliquod meæ erga te voluntatis ostendere; id primum conari volui, cujus maximè studiis deditum te esse sentirem. Sed ut revertar ad ea, quæ cæperam; quum sæpe in mentionem incidissem eorum hominum, qui nobis studia doctrinæ ab interitu vindicarunt, dolebam equidem, quum a nobis multum summis ingeniis deberetur, nos esse ad remunerandum tardiores. Itaque cum multis sæpe in locis, tum maxime nuper in insula, quæ est in lacu Volsiniensi,
eorum

eorum est habita mentio. Nam quum ex Urbe aliquot adolescentes in insulam venissent, essetque nobiscum Alexander Farnesius, adolescens cum ingenuis artibus instructus, tum summa mecum benevolentia conjunctus, cœpimus ibi sedentes inter nos colloqui multis variisque de rebus, propter loci amœnitatem; quumque quæreretur, quinam essent hi, quorum ingeniis sunt sopita studia excitata: rogavimus omnes Antonium quendam majorem natu, doctissimum illum quidem hominem, & ingenii acerrimi, ut, si ei placeret, quid de his viris sentiret, explicaret. Quod quum ipse multa de unoquoque propriè, gravissimèque differuisset, collegissetque eos homines uno sermone, usque ad hanc ætatem; tantum me illà vel copià, vel illo orationis cursu delectavit, ut decreverim eum ipsum sermonem mandare litteris. Quamquam non ignoro, quàm minus verecundè faciam, quòd primum tantam rem susceperim, quòdque mea scripta auctoritate tui potissimum nominis celebrari velim, quorum alterum esse potest hominis fortasse ingeniosi, & studio litterarum flagrantis; alterum verò nonnisi parum verecundi. Nam quicquid litteris mandatur



datur, qualecumque sit, per se laudabile est; at homo adolescens non satis instructus artibus, ac doctrinis, quum palam sua scripta protulerit, omnino avidior, quàm par est, gloriæ, videri potest. Tu tamen, Magne Laurenti, non tam meam hanc licentiam, quàm voluntatem metiare, ut si semel extra ripas verecundiæ defluxerim, existimes, me id licentiùs fecisse spe patefaciendi mihi aditum ad amorem tuum. Neque enim fas esse puto, quemquam inire tuam gratiam, nisi per virtutem. Quod mihi erit jucundius, si meam hanc voluntatem probaveris, ut aliquando approbatione divini ingenii tui, ad majorem laudem videar excitari. Vale.





*Ego tanquam Criticus antiquus
judicaturus sum.*

Cic. ad Dolabell.







PAULI CORTESII
DE
HOMINIBUS DOCTIS
DIALOGUS.



P A U L U S.



Nsula quidem hæc ex omni aspectu eximiam habet speciem pulchritudinis. Nam cum lacus ipse perlucidus, & frugiferis undique collibus cinctus vehementer delectet; tum hæc umbrosa saxorum altitudo, & hi vestitus riparum tantum voluptatis afferunt, ut cum me a frequentia hominum ad ocium conferre statuerim, nusquam potius sim. Quanquam tu quidem, Alexander, qui eundem gustum habes, quantum intelligere possum, hujus loci opportunitate libentissime uti soles. *ALEXANDER.* Ego vero cum ociosus
A sum,

sum, five quid volo sine interpellatoribus legere, five aliquid mecum ipse cogitare, hanc potissimum amœnitatem sequor. Sed est alia quoque causa, quæ me sæpius huc venire invitet, atque alleciet. *Paulus.* Quænam est igitur ista causa? *Alexander.* Quia hæc multa sunt monumenta majorum meorum. Nam Rhamnusius Avus meus hujus sacrarii fundamenta jecit; quod postea Patris, & Patru mei studio auctum est, ut vides, lautius, ac magnificentius. *Paulus.* Jure igitur a te diligitur hic locus. Et ego jam, non tam ejus amœnitate delector, quam recordatione Rhamnusi magni mehercule Viri, vel potius summi Imperatoris. Fuit enim is unus ex illo cœtu, & robore optimorum hominum. *Alexander.* Gaudio me tibi ostendisse hæc monumenta laudum domesticarum. *ANTONIUS.* Recte tu quidem facis, Paule, quod tantopere Rhamnusium laudas; videris enim mihi eum laudando felicitatem illorum temporum significare: & fuerunt omnino memoria Patrum, cum plerique bellicis rebus præclari viri, tum multi omni genere doctrinæ floruerunt. *Paulus.* Ego vero cum utrumque id genus hominum admirem, hos etiam amo, quorum industria sunt nobis aditus ad eloquentiam patefacti. Sed quoniam, Antoni, in hanc mentionem incidisti, erit nobis pergratum, si de his doctis Homi nibus quid sentias explicabis. *Antonius.* Quid dicit Alexander? *Alexander.* Mihi quidem erunt ista gratissima; & sane locus ipse, adhortari videtur, ut aliquid hæc inter nos in umbra col-

colloquamur , & sumus ociosi . *Paulus* . Recte tu quidem , Alexander ; scitum est enim illud , opus ocii extare oportere . Ordire igitur , Antoni , id , quod ex te requirimus . *Antonius* . Ego , etsi libenter hoc muneris , quod mihi imponitis , refugerem , tamen quoniam ita avide rogatis , ut durum admodum sit huic vestræ non obsequi cupiditati ; exponam omne meum vobis de Hominibus doctis iudicium , non tam ostentandi ingenii spe , quam negandi verecundia . Quæritis igitur quanti , & quales in disertorum numero habiti sint , & qui mihi ad aliquam eloquentiæ laudem maxime accessisse videantur . Ego vero si Avorum memoriam repetere voluero , ita reperiam eloquentiam obmutuisse , ut non tam calamitatem temporum deplorandam putem , quam gratulandum nostris hominibus , qui hæc ipsa studia nobis revocarunt . *Alexander* . Sane quidem , & ego quoque his ipsis hominibus plurimum me debere cogor confiteri ; sed tamen non video unde tanta varietas sæculorum , tot cæli mutationes innascantur , ut quarundam ætatum procurationem Dii immortales habuisse , quasdam omnino contempsisse videantur . Nam quot Oratores uno tempore Athenæ tulerunt ? Quanta dicendi vis ? Quæ disciplinæ ? Quæ ingenia ex uberrimis illius ætatis fontibus defluerant ? Quot una ætate Romæ Oratores florere ? Quot valere dicendo ? Mitto disciplinam rerum bellicarum : mitto præclara studia ceterarum artium . Contra vero quid avorum memoria bonarum artium egentius ? Quando

unquam litteræ diutius conticuerunt? Quando tantum obsolescere ingenia, ut plane omnia uni ætati Deorum munere concessa, alteri omnia fatali quodam malo erepta esse videantur? *Antonius*. Assentior in hoc tibi, Alexander, quod temporum varietates Deorum nutu fieri censeas. Quis enim dubitet cuncta a supremo illo Opifice præclaro quodam iudicio administrari? Sed omittamus istam doctorum hominum in cœlestium rerum investigatione scientiam. Explicandæ nobis potius erunt hæ causæ, quæ eloquentiæ studia funditus ex Italia sustulerunt. Ac primum mihi quidem videtur translatio illa domicilii Imperii Romani ex Italia in Thraciam, non minimam attulisse eloquentiæ iacturam; qua profecto emigratione, & aditus Italiæ patuerunt barbaricæ crudelitati, & Romanorum opes corruerunt. Nam barbaræ nationes odio diuturnæ servitutis, ac delendi nominis Romani cupiditate, in Italiam tanquam ad certam prædam confluxerunt; ex quo tantæ calamitates consequutæ sunt, ut cives suis sedibus pellerentur, immanes gentes in nostrum genus infunderentur, & civitates everterentur, & fortunatissima quondam Respublica dilaberetur. Nec vero solum hæ nationes una tantum præda contentæ fuerunt; sed etiam mille prope annorum spatio Italiæ possessionem acerbissima vexatione tenuerunt. Hinc colligatio affinitatis cum barbaris; hinc multis involucris inquinata latine loquendi consuetudo; hinc direpta, atque exusta infinita librorum copia. Quibus rebus factum est, ut
na-

nascentia ingenia omni ope destituta, & penitus in barbariem immersa languerint. *Paulus*. Quamquam omittamus ista, Antoni, quæ sine dolore audire non possumus: refricantur enim molestiæ commemoratione acceptarum calamitatum. Sed pergamus potius ad ea, quæ cœpimus de Hominibus doctis, Oratoribus enim non ausim dicere. *Alexander*. Mihi vero, Antoni, probantur satis ea, quæ modo sint a te dicta; sed tamen nemo negarit has clades, hæc incendia, varietatesque & temporum, & maximarum rerum fato quodam fieri, aut casu, aut cœli conversionibus. *Paulus*. Quorsum ista, Alexander? Noli quæso in hanc disputationem Antonium revocare. Sunt enim ista jamdiu a doctissimis illis Viris disputata, quæ & commodius tempus, & longiorem sermonem postulant. *Alexander*. Nihil sane impedio. *Antonius*. Quoniam igitur difficile admodum esset singulos nominare, qui aliquam eloquentiæ laudem attigerunt; de his tantummodo hoc loco dicendum erit, quorum scripta in manibus hominum versantur; & hi etiam nimirum, quos a majoribus, aut laudatos accepimus, aut, qui poetica aliqua gloria præstiterunt, in hunc sermonem referendi videntur. Nam posteaquam maximarum artium studia tamdiu in sordibus ægra, desertaque jacuerunt, satis constat: CHRY-

SO-

* EMMANUEL CHRYSOLORAS primus Græcas litteras variis barbarorum irruptionibus expulsas, post septingentos annos in Italiam reportavit. Is enim anno 1398. Byzantio emissus a Johanne Imperatore, ut totius Europa Reges adeundo perenti Græcia maturam opem imploraret, officium laboriosa peregrinatione implevit, ac Venetiis primum, mox Florentia, Romaque, ac demum Ticini, evocante ingentibus præmiis Johanne Galeatio Principe, Græcarum Litterarum studium excitavit. Constantia interijt anno 1413. Fufius Jov. in Elog.

SOLORAM BYZANTINUM transmarinam illam disciplinam¹ in Italiam advexisse; quo doctore adhibito primum nostri homines totius exercitationis, atque artis ignari, cognitis Græcis litteris, vehementer se se ad eloquentiæ studia excitaverunt. Et quoniam sublato usu forensi, illa dicendi laude carebamus, incredibile eorum studium fuit in scribendis, vertendisque ex Græcis in Latinum sermonem historiis. Sed cum historia munus sit unum, vel maximum oratorium, attingenda ea erunt, quæ in unoquoque potissimum laudanda judicabimus. *Alexander*. Video cur a Chrysolora exorsus sis, ut Dantem scilicet, & Franciscum Petrarcham interponeres, qui ante Chrysoloram aliquot annis floruerunt. *Antonius*. Non equidem, Alexander, a Chrysolora exordium cœpi, ut istos interponerem, sed quoniam illis temporibus erexisse se admodum eloquentia videri solet, decreveram singulos nominare, qui ex præclara illa Chrysoloræ officina defluerunt. *Alexander*. Cupio sane audire de his duobus quid sentias. *Antonius*. Ego vero negare non ausim flagrantissimum in Dante, & in Petrarcha studium fuisse prisca rerum; sed in² DANTE, tanquam in veteri pictura, detractis coloribus, nonnisi delineamenta delectant. At jure cum honoravit fama. Præclarum ejus³ Poëma plane indi-

¹ Cosmi Medic. ope Athenæ Florentiam commigrarunt. Aver. Op. T. 3. Or. 12.

² De operibus Latinis dictum puta; ceterum Etrusca laudatoribus non egent.

³ Jovius in El. *Primus Italarum Dantes Aldigerius non instituto vetustatis ordine tantum, sed præcellenti gravis ingenii fecunditate primum locum inter imagines meritis, optimo jure conspicitur*. Nemo hæcenus extitit, Leonardo Salviato teste, qui Dantem divinæ Comædiæ scribendi genere potuerit vincere; usque adeo vocabulis, & elocutionibus suis proprius est, quamvis insolens, quod sibi delegerat argumentum, eum sæpe cœgerit voces, atque phrasas satis singulares usurpare. Claruit an. 1300.

dicat incredibilem ingenii magnitudinem. Mirabile illud certe fuit, quod res tam difficiles, tam abstrusas vulgari sermone auderet explicare. Est enim in sententiis subtilis, & argutus, acerbus in reprehendendo, in probando nervosus; sed interdum etiam rebus non satis apertis ¹ obscurus. In permovendo autem, & incitando, non est credibile quantum sit concitatus, & vehemens. Utinam tam bene cogitationes suas latinis litteris mandare potuisset, quam bene patrium sermonem illustravit! Sed ad PETRARCHAM veniamus; cujus de ingenio, industriaque ex tam multis ejus libris existimari potest. Homo enim interpellantium multitudinem fugiens ² multa scripsit in ocio. Hujus sermo, nec est latinus, & aliquanto horridior; sententiæ autem multæ sunt, sed concisæ; verba abjecta, res compositæ diligentius, quam elegantius. Fuit in illo ingenii, atque memoriæ tanta magnitudo, ut ³ primus ausus sit eloquentiæ studia in lucem revocare; nam hujus ingenii affluentia primum

¹ Altissimo ingenio, atque incredibili præditus fuit Poëta Dante, qui res obscuras, & difficiles persequutus est. Bocch. in Elog. Videndus Vincent. Gravina Rag. Poët. l. 2. edit. Neapol. an. 1716. pag. 177.

² Circa annum 1340. scribit Vossius de Poët. Latin. c. 7. Petrarcha longe lateque diffundere cupit ingenii divini, doctrinaque miranda varia monumenta.

³ Paulus Vergerius in ejus Vita: Unicus fuit (Franciscus) qui per tot sæcula exulantem, & jam pene incognitam dicendi facultatem in nostra tempora revocaret. Erasmus in Ciceroniano: Resurgentis eloquentia princeps apud Italos videtur fuisse Franciscus Petrarcha sua ætate celebris, & magnus, &c. subdens in eo fuisse ingenium ardens, magna rerum cognitio, nec mediocris eloquendi vis. Atqui est ubi desideres in eo Lingua Latina peritiam, nam tota dillio respicit sæculi prioris horrorem. Sed debeamus plurimum (Jovius in Elog.) ingenio sudore semper astuanti, dum litteras a multo avo misere sepultas & Gothicis sepulchris excitaret. Vide quæ doctissimus Benedictus Averanius de Petrarcha Litterarum Latinarum vindice disserit Oper. T. 2. Diss. 50. in Ciceronem, ac ea quæ Cl. Vir Apostolus Zenus Venetus in Ephemer. Literat. Ital. T. IX. ubi verba refert Leonardi Aretini satentis, Petrarcham primum fuisse, qui studia eloquentiæ in vita revocavit.

mun Italia exhilarata, & tanquam ad studia impulsa, atque incensa est. Declarant ejus Rhythmi, qui invulgus feruntur, quantum ille vir consequi potuisset ingenio, si latini sermonis lumen, & splendor affuisset; sed homini in fæce omnium sæculorum nato illa scribendi ornamenta defuerunt. Sed ut saluberrimæ potiones, non suavitatis, sed sanitatis causantur: sic ab eo non est delectatio petenda, sed transferenda utilitas; quamquam omnia ejus, nescio quo pacto, sic inornata delectant. Huic ob multarum rerum doctrinam, & ingenii famam honores amplissimi habiti sunt. Et iisdem temporibus fuit JOHANNES BOCCACCIVS, sed decennio fere minor, quam Petrarcha. Hujus etiam præclarissimi ingenii cursum * fatale illud malum oppressit; excurrit enim licenter multis cum salebris, ac sine circumscriptione ulla verborum. Totum * genus inconditum est, & claudicans, &

je-

* *Fatale illud malum oppressit* (scil. barbaries latini sermonis.) Fuere & alii, qui Boccaccium Italicæ Linguæ potius, quam Latinæ facundia multo peritissimum appellarunt, sicuti Flavinus Blondus; sed id tantum sæculi vitio adscribere. Audi Lilius Gyraldum in Epist. Non tamen equidem inficias ierim, Johannem Boccaccium hominem fuisse studiosissimum, & elegantis ingenii, ut ea ferebant tempora; ingeniosum etiam, & eruditum, sed non in Latinis, & eo minus in Græcis is fuit, qui in proprio idiomate, hoc est in Etruscis, patrio scilicet, & vernaculo sermone, omnes qui ante, & post eum scripserunt, magno post se intervallo reliquit. Subdens alibi; Franciscus Petrarca, & Johannes Boccacius præter ea, quæ multa soluta oratione uterque composuit, nonnulla quoque carmine Latino scribere, in quibus non multo præstat alter alteri. In his, licet quod temporum tamen vitio adscribendum putarim, multum tamen Poëti spiritus habere videntur. Hinc est quod Jo: Matthæus Toscani de Petrarcha ait: Latinam idem Poësim jam sepultam, ea felicitate excitavit ab inferis, ut ejus ergo primus a Christo mortuo Roma laurea donatus sit. Pepl. Ital. Lib. 1.

2 De Genealogia Deorum dictum intelligo. Theogonia non admodum accuratum, ac Mythologia non satis idoneum enarratorem judicavit Boccaccium Balthasar Bonif. lud. Hist. lib. 15. c. 3. Sed fat illi est ob alia immortale nomen adeptum. Trithemius Poëtam, Philosophum, & Astronomum celeberrimum nominavit. Paulus Jovius ita de eo: Obsoleseunt, & ægre quidem vita spiritum retinent Libri de Genealogia Deorum, &c. & de

jejunum; Multa tamen videtur conari, multa velle. Ex quo intelligi potest, naturale ejus quoddam bonum inquinatum esse pravissima loquendi consuetudine. Eodemque modo de ¹ JOHANNÉ RAVENNATE, & COLUCCIO SALUTATO judicare licet; qui nunquam etiam ab orationis asperitate mæstitiaque abesse potuerunt.

Alexander. Gratissima ista mihi fuerunt: Et sane multum, ut dicis, horum gloriæ iniquitas temporum detraxit, & quasi ingeniorum acies perstrinxit.

Antonius. Nunc autem octoginta fere annorum memoriam hoc sermone complectemur. Sed quoniam uno tempore omnes, ac prope æquales fuerunt, multique sunt multorum ætatibus implicati; dabitis veniam si minus ætatum ordines servabuntur. Magistro igitur Chrysolora, plerique nostrorum hominum, tanquam ex palæstra quadam impulsī se ad eloquentiæ studium contulerunt. Quorum inprimis laudandus est ² LEO-

B

NAR-

de Fontibus accurate potius, quam feliciter elaborati, quando jam illa decem dierum Fabula, Milesiarum imitatione in gratiam oblectandi ceti, admirabili jucunditate composita, in omnium nationum Linguas adoptentur, & sine ulla suspitione interitus, applaudente populo cunctorum operum gratiam antecedant. Author noster de Cardinalatu lib. 2. pag. 95. Boccaccium ob genus Etruscæ locutionis laudat. Vide sis doctorem hominum, Principumque industrias, ut *Decameron* expunctis damnosis illecebris in manus omnium ad publicam utilitatem perveniret, in editionibus Leonardi Salviati apud Juntas.

¹ JOHANNES RAVENNAS celebris Rhetor fuit, qui floruit prope an. 1400. Hic, Blondo teste, *Petrarcham senem puer novis.* Celebris & iisdem temporibus COLUCCIVS SALUTATUS duorum Summorum Pontificum a secretis, ac Reipublicæ Florentinæ Scriba, de cujus obitu Divus Antoninus: *An. Domini 1406. D. Coluccius migravit ad Dominum, qui fuit Cancellarius Communitatis per triginta annos, vir justus, ac reclus, magna scientia, & eloquentia, &c.* Libros aliquos edidit poeticos; & ex deliberatione Magistratus fuit coronatus laurea mortuus, ut Poëta; sepultus honorifice in Ecclesia majori. Flavio vero Blondus Cortesii sententiæ adhxere videtur quum Ital. illustr. lib. 1. magis Coluccii doctrinam, quam eloquentiam laudet; quamquam id vitio sæculi, ut diximus, adscribatur.

² De ARETINO sic Jovius in Elogiis: *Primus in Italia Leonardus Aretii natus, Gratiarum litterarum decus a multis sæculis Barbarorum inhumani tyrannide proculcatum erexit,*

NARDUS ARETINUS. Hic primus inconditam scribendi consuetudinem ad numerosum quendam sonum inflexit; & attulit hominibus nostris aliquid certe splendidius. Multæ sunt in eo oratoriæ virtutes; gravis est in toto genere, & prudens, & ut illis temporibus non incultus. Historiam complexus est animo aliquanto majore; nam orationes ejus, quæ exstant, non æque ac historiæ probantur. *Alex.* Est ut dicis, Antoni, nam & ego sæpe legi funebres ejus quasdam laudationes, quæ mihi quidem non satis probabantur; atque id accidisse putabam, propterea quod nullæ exstarent orationes funebres ex antiquissimis illis auctoribus imitandæ; ex quo minime mirum videri solebat, si Leonardus ipse in eo præsertim dicendi genere orator fuerit; si modo orator, copiosior, quam aptior, aut ornatio. *Antonius.* Præclare intelligo quod dicis, Alexander. Et sane mihi videtur nihil posse ornate, varieque dici sine exercitatione, qua optimum quemque imitando effingimus. Quin etiam ipsemet multos jam sæpe cognovi, qui potius in quodam imitationis genere, quam in differendi præceptis operam ponendam putarint. Sed tamen non erit eloquentiæ vis in hunc tam angustum locum adstringenda, ut cum imitatio desit, quicquam præclarum assequi nos posse diffidamus.

Quis

xit, atque restituit. Ejus enim incomparabili beneficio morales Aristotelis Libros optima fide traductos legimus, &c. Hac ingenii fecunditate florentem Innocentius Septimus, quamquam plane juvenem, gravissimo muneri parem, epistolarum Magistrum fecit, &c. Novissime vocatus in Etruriam populi Florentini res gestas perscripsit, nec multo post senex divitiis, & gloria plenius Florentia vita functus est: dignus utique sepulchri titulo, ac marmoris ornamento, quod in Æde S. Crucis spectatur. Obiit an. 1443. ætatis suæ 74.

Quis dubitet orationes omnes funebres in laudationum genere versari? Quis de laudibus dicturus, si nulla præsertim erit imitatio, ad artis præcepta non confugerit? Ars profecto via certior est, quam imitatio; qua opes atque ornamenta ad differendum supeditantur. *Alexander*. Dii immortales, quam jucunda ista mihi fuerunt! Cupio me jam ab imitatione ad artis præcepta conferre. *Antonius*. Cave, *Alexander*, in Oratore quicquam putes esse imitatione præstantius. Nec enim est aliud imitari, quam effingere præscriptam disserendi artem. Sed quoniam sine artificio tam facile possumus vitia, quam virtutes imitando consecrari; eam ob causam non desinam vos, & carissimum mihi quemque cohortari, ut hæc disserendi præcepta toto animo complectamini. Nulla est enim tanta ubertas ingenii, nulla tam diligens imitandi industria, quam sine hujus artis ratione bene disposita, ac præclare inventa possit effingere. Ex quo efficitur, ut plerique bona maxime probent; sed cur probent nesciant. Idem nihil laudis in scribendo consequuntur, nisi quando fortuitu, aut natura. Intelligendum est igitur certissima quadam artis ratione, quid sit ex arte scriptum; quid imitari debeamus; quando alienis exemplis; quibus ornamentis oratio nostra coloretur. Sed hæc nimis fortasse multa. *Paulus*. Immo pauciora, quam vellem. *Alexander*. Mihi vero, *Antoni*, tantum ista profuerunt, ut nunc demum aliquid imitando consequi me posse putem; antea vero obducta caligine adumbratum

fuisse. Sed jam iterum ad Leonardum revertere. *Antonius*. Leonardus igitur, cum admodum adolescens in Chrysoloræ ætatem incidisset, litteras Græcas acerrimo studio complexus est. Frequenter & legens, & audiens tantum his studiis operæ dedit, ut multa celeriter ex Græcis mandarit latinis litteris. Habebat is quandam eloquentiæ formam animo comprehensam, quam omnino, non ut voluit, sed ut potuit expressit; & erat illi ingenium a natura capax omnium doctrinarum, quod etiam arte quadam expoliverat. Historiam vero scripsit accurate: conciones aliquot sunt graves: consilia, & bellorum initia, atque eventus explicantur valde prudenter: conscribitur in historia quiddam Livianum, non ausim dicere Ciceronianum. Sed cum historia sit rerum omnium difficillima, tantum in ea imitandi industria, & bonitate quadam naturæ consequutus est, ut omnibus mea sententia, qui post eum fuerunt, facile præstiterit. Et quamquam in toto genere minus plerunque lectis verbis utatur; ita tamen ejus oratio multis litteris, ac quibusdam sententiarum luminibus expolitur, ut vitium potius corrupte loquendi ætati illi tribuas, quam ei scribendi laudem ademeris. Et ego video hunc nondum satis esse limatum, nec delicatiori fastidio tolerabilem. Atqui! Dialogi Johannis Ravennatis vix semel leguntur, & Coluccii Epistolæ, quæ tum in honore erant, non apparent, sed Boccaccii Genealogiam legimus, utilem illam quidem, sed non tamen cum Petrarchæ ingenio conferendam. At non

videtis quantum his omnibus desit? & cum in tanta asperitate versetur antiquitas, quantum splendorem Leonardus, quanta dicendi ornamenta attulerit. Num propter quædam inquinata, & obsoleta verba eum respuemus? *Alexander.* Sane quidem semper Leonardum, ut doctum hominem, ut eloquentem, ut illius ætatis principem laudavi; sed nosti morem nostrorum hominum, qui nihil nisi excultum, nisi elegans, nisi politum, nisi pictum probant. *Antonius.* Sic ita. Sed redeamus ad nostros. Leonardi igitur fere æqualis fuit ¹ GUARINUS VERONENSIS, doctus magister. Is in domestica, & umbratili quadam exercitatione multa scripsit prudenter, ac probe, & docuit multos. Hujus domus quasi officina quædam fuit bonarum artium. Nam cum illis temporibus diuturno, gravissimoque bello Italia flagraret, & is esset iterum status, ut nemo fere adolescens non sibi potius gloriam bello, quam doctrina quærendam putarit, nunquam sunt ab eo instituendi, ac docendi studia intermissa. Erat referta domus nobilissimis adolescentibus, qui se in ejus disciplinam tradiderant: quoridie, & commentabantur, & declamabant, ac ita diligenter Græcis, Latinisque litteris erudiebantur, ut omnes fere illius ætatis, qui aliquam sunt scribendi laudem consec-

¹ Ab hoc insigni viro Græca, Latinaque littera obscuris illis temporibus, antiqui sæculi normam, quadrataque structura ordinem, & diu questum decus receperunt. Hujus quoque immortalis beneficio Strabonem ferme totum legimus, atque item aliquot Plutarchi Vitæ in Latinum accurate conversas. (Jov. in Elog.) Multos item Guarinum docuisse testatur Pius Secundus de eo inquiens: *Magister fere omnium, qui nostra ætate in humanitatis studio floruerunt* (Comment. lib. 2.) multaque alia elucubrassè docet laudatus Author additionum ad Voss. in Ephemer. Lit. It. T. XII. annum inter alia ostendens ejus obitus, qui fuit 1460.

sequeuti, se se omnino faterentur, ex hujus hominis umbraculis, tanquam ex ludo quodam honestissimarum artium profectos. Is igitur cum scribendo, tum docendo quæsit sibi id nominis, quod etiam hac ætate omnium sermone, & fama celebratur. Genus tamen dicendi inconcinnum admodum est, ac salebrosum: utitur plerunque imprudens verbis poëticis, quod est maxime vitiosum; sed magis est in eo succus, quam color laudandus. Hunc Georgius Trapezuntius exagitat, ut præfractum, & puerilem in compositione. Memoria teneo, quendam familiarem meum solitum dicere: melius Guarinum famæ suæ consuluisse, si nihil unquam scripsisset; tam vehementem opinionem ejus doctrinæ esse in animis hominum insitam, ut non modo nomen ejus non illustretur scriptis, sed etiam in dies magis obscuretur. Ego vero non ita sese rem habere existimo, nec temere Guarino gravitatem quandam in scribendo, nec multarum rerum cognitionem adimo; sed tamen non omnia in eo probarim. Nunquam enim asperitas in dicendo laudatur. At laudandus est, ut qui multum nostris hominibus profuerit, & ut qui, si non perfectam eloquentiam (cujus speciem, quasi per caliginem quandam viderat) at aliquam in scribendo laudem sit consequutus. Iisdem temporibus fuit: NICO-

LAUS

1 NICOLAUS NICCOLUS Patr. Flor. qui Florentiæ obiit an. 1436. ætatis suæ septuagesimo tertio, ut patet ex sepulchrali elogio in peristylio Ecclesiæ Sancti Spiritus, Latinas Græcæque literas amicorum ope non parum juvit. De quo sic Poggius in funebri Oratione in ejus obitu: *Qua in re vere possum dicere, omnes Libros fere, qui noviter tum ab aliis reperti sunt, tum a me ipso Græc. Nicolai suavis, impulsu, cobortatione,*

LAUS NICCOLUS, qui magnam gloriam adeptus est incolendis amicitiiis doctissimorum hominum. Fuit, & ¹ NICOLAUS SAGÜNTINUS Chalcidensis homo Græcis litteris, & Latinis eruditus. Erat in dicendo satis copiosus, sed parum vehemens, & in affectibus viro mollior, ut maxime in suo libello, quem de naufragio suo ad Bessarionem Nicenum scripsit, apparet. Et ² AURISPA Siculus sane doctus, & honoratus fuit. Eodemque in genere, & ³ CANDIDUS habebatur; sed avidior duritatis, quod orationis mœstitia insolentius uteretur. Tum etiam constat, NICOLAUM EUBOICUM memoria præstitit; sed istorum omnium fuit disciplina horrida, & agrestis, sine nitore elegantioris industriæ. Nondum erat tunc politior scribendi ratio importata. Atque horum ætati adjuncti sunt duo fere æquales, ⁴ PETRUS PAULUS VERGERIUS,

&

tione, & pene verborum molestia esse litteris latinis restitutor. Videre est Nicolai Testamentum ubi vocantur exequutores Viri omnes summa prudentia ac literis præditi, apud Cl. V. Salvinum Salvinium Canonicum Florentinum, qui plura ad hunc Dialogum spectantia humanissime suppeditavit.

¹ Hunc vocat paulo post NICOLAUM EUBOICUM. De eo Matthæus Palmerius in Chron. *Nicolaus Euboicus Latina, & Græca Lingua, atque elegantia princeps laudatissimus habetur, qui frequenti Concilio medius affluens, multis, & eruditis viris audientibus, &c. Æneas Sylvius in Cosmograph. cap. 54. Nicolaus Saguntinus utraque linguæ disertissimus, ingenio facundisque juxta promptus illustre nomen adeptus est.*

² JOHANNES AURISPA patriâ Netinus, plurium linguarum cognitione, carminibus profaque oratione clarus, de quo luculenter Antoninus Mongitor in Biblioth. Sicula.

³ PETRUS CANDIDUS December e Viglebano Urbe, quæ est inter Padum, & Ticinum, Laurentii Vallæ testimonio exactissimæ censuræ Grammaticus, Mediolani Græcæ, Latineque docuit præstanti eruditionis, ac eloquentiæ fama. Anno 1477. octogenarius fato functus est. Huic litteras scribit Franciscus Philadelphus. Citatur hic Coriæsi locus a Cl. Viro Apost. Zeno in addit. ad Voss. in Ephemer. literator. Ital. T. 12.

⁴ Discrepat judicium Johannis Matthæi Toscani, qui ait: *Vergerii Justinopolitani Liber de ingenuis moribus, ac liberalibus studiis, præ cunctis ejus incubrationibus probatur a doctis; est enim nitido, ac delucido stylo conscriptus. At Arrianum inculto sermone versisse de industria traditur.* (Pepl. Ital.) Discrepat & illud Pauli Jovii 112 de

Ver.

& ¹ SICO POLENTONUS; uterque a puero doctus, sed alter ornatior, non tamen adeo cultus, ut sit hac eruditiori ætate tolerabilis. Libellus de Adolescencia, quem pueri legebamus, vix compareret, & bene olet (ut dicitur) quod nihil olet. Alterius sunt viginti ad filium Libri scripti de claris Scriptoribus, utiles admodum, qui jam fere ab omnibus legi sunt desiti. Est enim in judicando parum acer, nec servit aurium voluptati, quum tractat res ab aliis ante tractatas; sed hoc ferendum. Illud certe molestum est, dum alienis verbis, sententiisque scripta infarcit, & explet sua; ex quo nascitur maxime vitiosum scribendi genus, quum modo lenis, & candidus, modo durus, & asper appareat, & sic in toto genere, tanquam in unum agrum plura inter se inimicissima sparsa semina. Inter horum ætates interjectus est ² MAPHÆUS VEGIUS, qui tum Poëta numerabatur, ingeniosus ille

Vergerio ejusque Libello loquentis: *Latine autem scribendi singularis eo saculo facultas enituit, uti apparet ex eo libello, qui de educandis liberis ad exactam disciplinam pervenire, atque prudenter scriptus, me puero in scholis legebatur.* Editus est Brixix 1485.

¹ Melius forsan XICCO. Patavii enim in Divi Joannis in Viridario, ut refert Scardeonius Lib. 1. Class. 8. erectum nobile monumentum *Modesto Polentono Equiti insigni, & Juriconsulto excellentissimo Xicconis Polentoni eximii Oratoris filio.* De hoc nomine audiendus Jos: Gerardus Vossius, rem ita expendens. *Verum autem nomen Xicco esse indicat manuscriptus Carrariensis codex, &c. in quo Instrumentum publicum legitur, quod nomine Domini Francisci junioris de Carraria confecit.* Hic Civis Patavinus, & Republicæ ejusdem Scriba fuit. Reliquit volumen magnum De illustribus Scriptoribus Latinis.

² Vide Paulum Jovium in Elog. ita de MAPHÆO VEGIO Laudensi differentem. *Qui heroico spiritu Maronem feliciter amulatur, quum Æneidem addito libro supplevisset, omnes fere a mille annis illustres Poëtæ, nec excepto quidem Petrarcha laureato, præclara cum laude superavit. Sed gravioris quoque doctrina, & summa prudentia opinione, Martini Pontificis amicitiam consequutus, in conferendis Sacerdotiis supplicium libellorum officio præfuit, ita ut mox Eugenio, & Nicolao carissimus fuerit. Ejusdem Supplementum Æneidos Pub. Virgilii impressum fuit Venetiis 1485. Librum vero de significatione verborum in jure civili, aliumque de educatione liberorum, Vicentix, ac Mediolani impressos fuisse monet Orlandus de Orig. Typogr. Ceterum Vegius obiit an. 1457.*

ille quidem, sed aliquanto turgidior, necdum satis politus, quanquam ætatis illius istud fuit vitium. *Alexander*. Audax iste quidem fuisse videtur, & animi maximi; utinam majoris facultatis, qui Maroni voluerit vicarius succedere. *Antonius*. Scitum est illud Poëtarum, neminem meliorem quam se putare, & sua cuique placere. Nam quum Poëta vi naturæ inflammeretur, nunquam desperat, quod optimum est; & propterea multos decipit illa P. Maronis blanda sui conciliatrix Musa, quum dulci tantummodo sono deliniti reconditum artificium non agnoscant. Sed ut ad rem redeam, ejusdem etiam ætatis fuit ¹ AMBROSIIUS Monachus Græcis litteris doctus. Scribebat facile, & naturalem quendam dicendi cursum habebat oratio, sed admodum incultum. Erat in hoc homine inexhaustus quidam legendi amor; nullum enim patiebatur esse vacuum tempus. Quotidie, aut scribebat, aut aliquid ex Græcis, Latinis litteris mandabat. Plura tamen orsus est, quam absolverit. Nemo certe plus studii, quam ille ad eruendos ex adyto priscorum libros adhibuit.

C Ca-

¹ Paulus Jovius: AMBROSIIUS Monachus ex Ordine Camaldulensium, qui supra Florentiam in opacis Apennini jugis dicatam cœnobio vitam ferre ducunt, doctrina gravitate, ac ingenii præstantia aequales suos antecessit. Græcæ enim, atque Latine doctissimus, complerente Cosmo, & mox Eugenio, & Nicolao admirantibus, summum ejus Ordinis honorem, qui Generalis Præfectura hodie dicitur, ita adeptus est, ut eum constanti judicio Patres purpura destinarent. Dionysium enim Arcopagitam de cœlesti hierarchia, divino Spiritu proloquentem singulari eloquentia puritate Latinis expresserat, atque item Diogenem Laërtium, verum non eadem cura perpolitum. Sed & sacris operibus Bibliothecam, qua ad Angelos spectatur, cumulate refecit: quibus existimari potest, nequaquam ei vires, & facultates, sed animum omnino defuisse, ut ad Romanæ fauenda fastidium perveniret; abstractus enim in altitudinem Christianæ contemplationis, uti pium sacramque Virum decebat, totius vitæ oclum in divinis literis consumpsit. Vide Gaddium de Scriptor. non Eccl. T. 1.

Carus hic fuit Cosmo Medici; nam semper magnus ille Vir secum habuit palam doctos homines, quorum in congressu, & sermone, quum esset publicis muneribus vacuus, tanquam in jucundo quodam animi laxamento quiescebat. *Alexander*. Mea quidem sententia est Principes illius ætatis multum summis ingeniis profuisse. *Paulus*. Est ut dicis; aluntur profecto præmiis hæc studia, & quasi in Principum sinu pubescunt. Sed persequere, Antoni, ut cœperas. *Antonius*. Tum etiam eo genere numerabatur * LEONARDUS JUSTINIANUS, homo per se magnus, &, ut apparet ex Orationibus, non indiser-tus. Exstat ejus quædam funebris laudatio, bona illa quidem, sed non satis splendida verbis, & quæ magis copiam quandam, quam oratorium artificium præferat. Nam hæc ætas ponebat eloquentiam in orationis quadam abundantia, nec plane cognovit quid esset satis; quum magnam se quisque in dicendo laudem adeptum putaret, si multa acervatim complexus fuisset. Quod genus scribendi spre-tum est, ac repulsum ab acrioribus ingeniis: quoniam omnis oratio ita & verborum, & sententiarum ornamentis componenda est, ut non intemperanter excurrat, sed sit ei suorum finium quidam circum-scri-

* Jo: Gerardus Vossius de Histor. Lat. hæc habet: Anno 1430. magno in pretio erat LEONARDUS JUSTINIANUS Patricius Venetus, & Eques aureatus Leonardi Justiniani clarissimi Oratoris non filius quidem, ut Philippus Bergomas tradidit, sed ut bene apud Volaterranum est, nepos. Non semel cum laudat in Convitiolorum Libris Phil-elphus. Idem præterquamquod orationem funebrem in Carolum Zenum edidit, scripsit, vel potius velut Paraphrasis ex Scriptoris Græcis confarcinavit Vitam S. Nicolai. Vide plura apud Cl. Virum Apostolum Zenum in Ephem. Litter. Ital. T. IX.

scriptus locus. Horum æqualis fuit ¹ CAROLUS ARRETINUS illis etiam temporibus honoratus. Pauca is admodum scripsit, quæ nescio quo pacto jam exaruerunt, vel potius non apparent. Et ² JOHANNES etiam TORTELIUS Arretinus scriptor fuit sane probabilis. Conjunctissime is vixit cum ³ NICOLAUS V. Pont. Max. nam ipsum etiam Nicolaum doctum hominem ferunt, & non infantem fuisse; in quo magnum documentum fortunæ fuit, quam celeriter extollat quem semel complexa sit. Is enim biennii spatio gradibus ascendens, summam est adeptus orbis terræ dignitatem; idque eo contigit honorificentius, quo nemo esset, qui illum eo honore non dignum arbitraretur; & merito id quidem,

C 2

quan-

¹ CAROLUS nempe ex Familia de MARSUPPINIS. Æneas Silv. in Hist. Europæ hæc habet: *Commendanda est multis in rebus Florentinorum prudentia, tum maxime quod in legendis Cancellariis, non Juris scientiam, ut plerique Civitates, sed Oratoriam spectant, & quæ vocant Humanitatis studia; norunt enim recte scribendi, dicendique artem, non Bartolum, aut Innocentium, sed Tullium, Quintilianumque tradere. Nos tres ex ea Urbe cognovimus, Græcis, & Latinis conditorum Operum fama illustres, qui Cancellariam aliis post alium tenuere; Leonardum, & Carolum Arretinos, & Poggium ejusdem Reipublicæ Civem, qui Secretarius Apostolicus tribus quondam Romanis Pontificibus distans Epistolæ. Flavius vero Blondus in Ital. illustr. Per atatem quoque nostram eloquentissimo, & clarissimo Leonardo Arretino, Caroloque Græcis, & Latinis litteris eruditissimo, nunc populi Florentini Cancellario, &c. Urbe Arretina decorata est. Obiit an. 1453. & a Matthæo Palmerio Viro disertissimo laurea coronatur. Vide sæpe laudatum Virum Apostolum Zenum in Ephemer. Litter. Ital. T. X.*

² De JOHANNES TORTELIO Arretii nato Archipresbytero Arretino, ac Domini Papa Subdiacono, ut in quibusdam monumentis laudatissimæ Bibliothecæ Strozii legitur, memoriæ proditum est, quod cum Valla omnium Grammaticorum hostis mire dilexit, & tanquam summum sibi censorem delegit, suoque encomio ornavit, ut Græce Latineque apprime eruditum, quibus artibus in intimam se Nicolai Pontificis insinuavit familiaritatem. Vide Jo: Matt. Tosc. in Peplio Ital. & Paul. Jov. in Elog. Doctor. Viror. ac plura si libet in sæpeditis additionibus Cl. Zeni ad Vossium de Hist. Lat. in Ephemer. Litter. Ital. T. XI. ubi Tortelii vitam annum non excessisse 1466. invenies.

³ De NICOLAUS QUINTO Sum. Pont. qui antea Thomas Sarzanensis appellatus est, viro litterarum, litteratorumque amantissimo, vide Platina, Ciacconium, Janonium Manertum in ejus Vita, & alios, inter quos Buffieres in Floscul. Historiar. Decessit an. 1455.

quando, & multa egit in vita præclare, & ab eo sunt docti homines & opibus aucti, & honoribus. Sed temporibus iisdem magnum vulnus res Latinæ ex direptione Byzantii pulcherrimæ, atque florentissimæ urbis acceperunt. Emerferat e patriis regnis Maumerthes spe potiundæ Græciæ inflammatus, sibi que persuaserat fore homo scientissimus rerum bellicarum, ac felix, si occupato Byzantio facultas daretur ad Græciam opprimendam. Nec enim eum fefellit opinio: nam capta, atque direpta urbe, facillime reliquus cursus patuit. Sed malo in tali re silere, quam veteres calamitates deplorando augere dolorem nostrum. Hoc tamen dicam, quod ad rem pertinet; magnum damnum excidio Græciæ latinas litteras fecisse, quum a Græcis multa in Italiam importarentur, & nostri item studiorum causa Byzantium tanquam ad domum quamdam doctrinæ proficiscerentur. *Alexander*. Sine ista, Antoni, nec enim unquam Latinis rebus, ut dicis, calamitosior dies illuxit, nec tetrrior; sed existimare debes plures post importunam illam cladem in Italiam confluisse, quam unquam antea. Sed ista omitamus. *Antonius*. Tum multum eloquentiæ habuisse dicitur FRANCISCUS BARBARUS, cujus de ingenio, doctrinaque ex eo libro, quem de re uxoria scripsit, existimari potest. Hujus gloriam illustrioribus litteris, & gravioribus artibus cumulavit: HER-

MO-

† FRANCISCI superioris nepos HERMOLAUS, Patriarcha Aquilejensis electus, qui immatura ætate obiit an. 1493. *Vir omnium disciplinarum peritissimus* nuncupatur a Ni-

MOLAUS Nepos. Sed multum duo doctrina præstiterunt : JANNOTIUS MANETTUS, & ² BAPTISTA ALBERTUS: quorum alter unus omnium doctissimus putabatur; alter etiam in Architectura disertus fuit. Sed in Jannotio admirabile quoddam studium omnium doctrinarum fuit; sed nescio quo pacto sit hujus summi viri, quam aliorum paullo ante dictorum nomen obscurius. Ex quo profecto intelligi potest, plus valere ad famam, & celebritatem nominis unius simplicis generis virtutem absolutam, quam multa annexa genera virtutum non perfectarum. Tum etiam ex eo genere numerabatur ³ PALLAS STROZA, quem

¹ Nicolao Leonicensi in Epist. ad Angelum Politianum. *Omnium e sua civitate, qui ante illum nati essent, Latinorum, & Græcorum litteris doctissimus*, a Petro Bembo. De eo Jovius in Elog. Jo: Matthæus Toscani in Peplo It. ac Paulus noster de Cardinalatu Lib. 1. pag. 60.

² JANNOTIUS Eques MANETTUS, Patricius Florentinus tribus Summis Pontificibus a Secretis, a Naldo Naldio, Poggio, aliisque multis laudatur. Hunc Eugenius IV. Pontifex modo appellabat *Virum dignum supra omnes Reipublica Florentina, modo Republicâ Romanâ dignum*. Vixit Alphonso, Ferdinandoque Siciliæ Regibus charus, obiitque Neapol. an. 1459. ætatis suæ 64. Vide Cl. Zenum in Ephem. Litt. It. T. XI. ubi plurima Manetti Opera numerantur. Ejus Vitam Cl. Vir Ludovicus Antonius Muratorius nuper edidit inter Rerum Italicar. Scriptora.

³ Simile huic judicium est Francisci Bocchii, qui quum narret una cum Paolo Jovio, atque Jo: Matthæo Toscanio, LEONEM BAPTISTAM in pictura scripsisse de recessibus, & umbris, reliquissæ Apologorum urbanæ gravitatis libellum, quo vel Æsopum inventionis amenitate superasse, de vita Civili Libros non fine laude elucubrasse, demum in doctrinis humanioribus eruditissimum evasisse; subdit: *Declarant Libri decem, quos de Architectura scripsit, qui vir, & quantus esset, &c. Nihil enim venuste, nihil commode moliri, aut fabricari atas superior solita erat, cum Leo Albertus res multas, easque præclaras suo ex ingenio deprompsit; & ut posset uniusquisque ad suum commodum explicare, declaravit eis in libris tam dæcte, tam industriè, ut a viris peritissimis Vitruvius sit Florentinus appellatus*. Hic Florentiæ familiâ Albertâ nobilissima ortus est. Testatur Paulus Jovius Leonis Baptistæ Politianum audita ejus morte nobile encomium ceinisse; quemadmodum fecerunt Janus Vitalis, Latomus, aliique; encomium fortasse illud est, quo Politianus epistolam incipit Laurentio Medici, quæ inter illustrium Virorum Epistolas ab Angelo Politiano collectas septima, est Libri Decimi.

⁴ Hic ex nobilissima familia STROZIA Eques aureatus, variâ opuscula edidit, ut testes gravissimi ferunt, præsertim in suis Epitolis Franciscus Philelphus, qui

cum

quem cum natura, tum studio doctrinæ sapientem ferunt. Excelluit enim is unus in omni genere virtutis. Nemo domi comior fuit, nemo jucundior. Nemo foris constantior, nec gravior, nec fortior. Nec longo intervallo aberat ¹ BENEDICTUS ARRETINUS, qui bellum Asiaticum magnum, atque difficile diligentissime prosequutus est; attulitque lumen rebus involutis: nam illis temporibus in ² POGGIO FLORENTINO quædam species eloquentiæ apparuit; in quo si tale artificium fuisset, quale ingenium ad scribendum fuit, omnes profecto ejus æquales dicendi gloria vicisset. Is Orationes reliquit, quæ & facundiam, & mirificam ingenii facilitatem ostendunt. Tendebat toto animo, & quotidiano quodam usu

enim etiam post mortem disertissima Oratione (quem MS. superesse ajunt) parentavit Patavii, ubi Pallas nonagenarius decessit an. 1462.

¹ De BENEDICTO ACCOLTI Arretino J. C. ac Reipublicæ Florentinæ a Secretis loquuntur Jo: Ger. Vossius de Historicis Latinis, Oldoinus in Ath. Rom. Gaddius de Scriptoris. non Eccles. Fusius vero Cl. Zenus Tom. XI. Ephemeridum. sæpe citat. qui inter alia annum ejus obitus nempe 1466. ætatis autem 51. ostendit. Dialogum Arretinus lucubravat, in quo quæritur, an præstantiores in litteris essent veteres, quam recentiores homines; qui non multis ab hinc annis formis excusus est. Scripsit de Bello Christianorum contra barbaros Libros quinque, de quibus Cortesius ait: *Bellum Asiaticum magnum, atque difficile, diligentissime prosequutus est*; quibus etiam tanquam argumento nobilissimi Poëmatis, vulgo *il Goffredo*, Torquatus Tassus usus est.

² Nec dissimile est illud Henrici Bebelii; qui de POGGIO ait: *copiâ, venustate, facilitate naturali, & sponte nascenti eloquentia jucunditate inafflata longissimè præcellere Valla Poggium non est ambiguum* (in litt. ad Leonardum Dunum an. 1513. Tubingæ scriptis) Judicium Erasmi in Ciceroniano tale est: *Poggius Florentinus virida cujusdam eloquentia vir, Græcæ natura satis erat, artis, & eruditionis non ita multum*. Paulus vero Jovius: *Poggius e Terranova Florentina ditioris oppido, in hac luce Romani culi optimis litteris ingenium ita expolivit, ut Pontificis sermibus præficeretur; aquatur scilicet honore summis viris, qui in eo munere fidelis, eruditique ingenii operam præstiterunt*. Natus est an. 1380. obiit 1459. Vide ejus Vitam a Cl. Viro Jo: Baptista Recanato Patricio Veneto luculenter descriptam. Poggii ingeniosam in dicendo facilitatem memorat Cortesius alibi.

usu ad effingendum M. Tullium. Sed habet hoc dilucida illa divini hominis in dicendo copia, ut estimanti se imitabilem præbeat, experienti spem imitationis eripiat. Eam igitur dicendi laudem Poggius si non facultate, at certe voluntate complectebatur; scripsit etiam Historiam. Sed est magnum munus historia; &, ut paulo ante dixi, omnium rerum difficillimum. *Alexander*. Ego vero sæpe solco mirari, quid sit, quod cum Historia tot, tantarumque rerum dissimilitudinem complectatur, nulla præcepta in priscorum artibus tradantur, quæ quomodo scribendum, quid servandum sit in Historia doceant. Nam, ut omitтам studia disciplinarum maximarum, omnium artium opifices habent sua præcepta. Architectus ab his non discedit; Musici etiam his erudiuntur, quando vocum mutationes facere debeant, quando scilicet cantus aut inflexam, aut gravem, aut acutam vocem postulet. Alii in lineis, alii in mensuris, alii ad fingendum, alii ad pingendum certis præceptis utuntur; ex quo intelligitur nihil magnum fieri posse sine quadam artis ratione: Historiam autem, tam arduum, tam difficile opus nihil habere præceptorum, non desino hercle satis mirari. *Paulus*. Ego quoque ista, quæ dicis, Alexander, mirabar, & sâne angebar intimis sensibus, quod a nostris hominibus Historiæ præcepta ignorarentur; nam priscos illos, ut ex eorum Historiis apparet, præclare intelligebam hujus artis præcepta tenuisse; nostros autem his instrumentis
 omni-

omnino carere, atque eosdem in hoc præsertim scribendi genere nihil admodum laudis consequi posse, nisi quando temere, aut casu. *Antonius*. Video, plerisque visum esse Historiam sine ullis ornamentis oratoriis scribi oportere, quod tollerent veritatem, & fidem; multum referre non esse mendacem: ego vero ut opinionem istorum non libenter laudarem, ita certe non repudiaverim. Et profecto magni interest, ubi tantummodo rerum gestarum veritas quæritur, mendacem, & fabulosum putari. Sed tamen quid attinet vere scribere, si omnia obscure perturbaveris? Ac mihi quidem hujus rei principium cogitanti, ad delectationem, & utilitatem adinventæ Historia videri solet, quæ omnino rebus, & verbis continetur. Res, ut profint, spatia, & temporum ordinem desiderant. Verba vero nunquam voluptati inservient, nisi concinnitatem retineant. Repudianda erit igitur horum opinio, & adhibendum artificium quoddam, ut prodesse pariter, & delectare possimus. Sed nescio quo pacto ad hæc delapsi sumus, cum id vos initio minime requireretur. *Paulus*. Immo ista requisivimus, Antoni, & sunt sane necessaria. *Alexander*. Mihi vero ista jucunda fuerunt; & utinam tibi, Antoni, cumulatus ista augere licuisset: sed dabitur fortasse aliquando commodius tempus hujus muneris amplificandi. Nunc ad institutum sermonem revertere. *Antonius*. Belle exigis a me, Alexander, tam magnum locum, & tantum hercle de me polliceris, ut si hoc vobis

ne-

negarim, non tam laborem me judicis refugisse, quam vestræ voluntati obsequi noluisse arbitremini.

Alexander. Atque nihil a te postulatur, nisi tuo commodo. *Antonius.* Jocaris etiam mecum, Alexander, & ego quoque in hoc admodum delector, & si-
no adulari, ac irrideri me interdum ab amicis.

Alexander. Non est ita, Antoni; scitum est enim nihil esse in amicitia perniciosius adulatione, & blanditiis.

Antonius. Quid ergo? Credisne, me modo ea ausurum dicere, quæ sint a priscis illis vi-
ris relicta? *Alexander.* Ego vero ex te istud non

requisivi, ut omnes leges, quæ sunt in Historia ser-
vandæ, quasi in schola quondam explicares: sed si
quod daretur vacuum tempus, postulabam, ut in-
ter nos hoc munus attingeremus.

Paulus. Quin tu, Alexander, omittis ista, quæ præparatum ocium
postulant. Tu vero, Antoni, perge quo cœpisti: ne-
que enim impediendus est interpellatione jam su-
sceptus sermo.

Antonius. His igitur florescen-
tibus proximus accedebat * GEORGIUS TRAPEZUNTIUS,
bonus sane Rhetor, qui aliquot annos populo Ro-
mano utilissimam operam præbuit, & docuit cum

D mul-

* Is Græcorum fere primus Roma eo tum sæculo renascentibus litteris, qui Græca
felicioris sæculi in Latinum verterit existimatus est, uti liquidissime constat ex Aristote-
lis, sacrisque Eusebii Casariensis operibus, & ex rhetoricis præceptis Hermogenis. Erat
animi ingenio ad lucubrandum maxime valido, vehementique, sed, uti mox apparuit,
setrici livoris pleno; nam quum se Peripateticum prosteretur, unumque Aristotelem
extollendo celebraret, usque adeo superba aure fuit, ut nec divini quidem Platonis in-
genium laudari pateretur, cujus etiam dogmata, & mores peracerbe, ac insolenter
edito famoso volumine laceraret. Hæc ab Jovio; at Erasmus in Ciceroniano TRAPE-
ZUNTIUM vocat Virum egregie doctum, deque re litteraria pulchre meritum. M. AN-
TONIUS Sabellicus Trapezuntium Bessarioni in dicendi facultate prætulit. Patria fuit
Cretensis, sub Nicolao V. Scriba Pontificius. Obiit Romæ prope an. 1484.

multos, tum etiam multa scripsit de artificio dicendi; & adhibuit in scribendo illa adjumenta, quæ habuerat a Peripateticis, qui præter ceteros Philosophos rationem dicendi latioribus quibusdam præceptis complectuntur: qui mos erudiendæ juventutis retentus est a ¹ POMPONIO nostro: vir enim per se magnus incredibilia studia ad eloquentiam limatioremque elegantiam convertit. Eodem tempore ² ANTONIUS LUSCUS fuit Rhetor quoque non contemnendus, quem etiam non indiserunt dicunt fuisse; nam ³ VICTORINUS FELTRENSIS, is quoque per tot annos toti Galliæ Transpadanæ tradidit præcepta dicendi, iisdem fere laudibus cumulatus fuit: nec verò ⁴ GASPARINUM VERONENSEM prætercundum puto. Erat is diligentissimus, ac prope perfectus Grammaticus; sed ipso Orationis genere exilis, & tristis, nimia enim cura attenuabat orationem.

Et

¹ JULIUM POMPONIUM LATUM Sanseverina illustri familia in Picentinis natum ferunt, qui floruit Pauli Secundi temporibus. De eo Vide Jo: Matth. Tosc. in Pæplo Ital. atque Ludovicum Vives, qui ubi de conscribendis epist. ait: *Romana puritatis (Pomponius) adeo studiosus, ut nec Græce quidem scire voluerit, ne quid alienum sonaret, aut admiseret Lingua illi; ita & verba habet electa, & dictionem satis castigatam.*

² In Archivo Gen. Flor. per Rog. Ser. Agnoli Pieri Thomæ de Terranova, legitur Anno 1419. 27. *Obiit Dominus ANTONIUS olim Domini Ludovici de LUSCHIS de Vicentia Secretarius Summi Pontificis facis suum procuratorem nobilem, & discretum Virum Antonium Dominici Buonafè.* Memoratur a Fr. Philalphi, qui illi epistolas scribit.

³ VICTORINO FELTRENSI Magistro usum fuisse ferunt inter alios Theodorum Gazam, usque adeo eum copiose, & diligenter latinæ litteras didicisse, ut longe omnium latinissime scriberet. Victorinus veluti D. Antonino Florentino Archiepiscopo par virtute, ac pietate laudatur a Francisco Castilionensi Ecclesiæ S. Laurentii Canonico, ut refert Gaddius de Scriptiorib. non Ecclesiast. T. I. pag. 9.

⁴ De GASPARINO Pergamensi dictum facili negotio putarem, utpote qui Epistoliarum Cynicarum Opus edidit Paris. circa an. 1470. per Ulricum Gering, & soc. in Domo Sorbonæ, postea vero recensum Basilæ 1489. de quo vide Peregrinum Antonium Orlandi de Artis Typographiæ progressibus.

Et ¹ OMNIBONI quoque LEONICENI in docendo cognita industria est. Erat in scribendo satis amplus, sed parum nitens, aut excultus: nullus candor est Latini sermonis, neque flos ullus, quem in oratione requirimus. Horum ætatibus adjunctus est ² LAURENTIUS VALLA scriptor egregie doctus, sed erat acer, & maledicus, & toto genere paullo asperior; diligentissimus tamen Romanarum rerum, atque verborum investigator. Molestus erat, & stomachosus; nihil admodum alienum laudabat; sua vero cum diligentia, tum acri quodam judicio expendebat. Limatior hic fortasse quam cæteri, nihilo tamen candidior fuit. Floruit hujus domus aliquandiu, & quasi ludus quidam fuit civium Romanorum. Verum postea is vel odio servitutis, vel desperatione quadam dignitatum adipiscendarum ab urbe Neapolin ad Alphonsum Aragonum Regem est profectus, ubi aliquot annis fuit magna cum gloria ingenii, & famæ; nam Alphonsus ipse ad summas,

D 2

in-

¹ OMNIBONUS LEONICENUS inter illustres Johannis Ravennatis Discipulos numeratur a Flavio Blondo Ital. illustr. Lib. IV.

² VALLA Patricius Romanus, & Canonicus S. Johannis Laterani a Gothicis temporibus (inquit Jovius) usque ad patrum nostrorum memoriam præalto sepultus summo civis suos ad nobilitum litterarum studium excitavit. Indignatus enim tandiu corrumpi sæculum leguleorum, & sophistarum immani conspiratione, optimasque artes inculta sermonis barbarie defadari, elegantiarum Libros edidit, traditis Romana elocutionis præceptis ex accurata veterum scriptorum observatione, &c. Extant inventivarum, & recriminationum aliquot Libri, erudite falsæque perscripti; quibus dum lasi nominis famam tueretur, Facium Ligurem, Panormitam, Poggium, & Raudensem jugulasse videri potest. Flagellatis quoque regionum ludimagistris, uti multa bile redundant, quod nihil in aula Pontificis sibi placeret, Neapolim ad Alphonsum Regem se contulit. Ibi tres Libros scripsit de rebus Ferdinandi Regis Aragoniæ ejusdem Alphonsi patris. Vide Trithemium, Toscanum, aliosque. Obiit Romæ quinquagenarius anno Christianæ salutis 1457. Ceterum Cortesii judicium de Valla probatur in additionibus ad Vossium T. XL. Ephem. Litterat. Ital. pag. 318.

incredibilesque ejus virtutes adjecerat etiam hanc laudem, ut non solum hominibus doctis familiarissime uteretur, sed etiam haberet in convictu. *Alexander*. Quid ergo est causæ, si tam diligenter Valla de ratione verborum Latinorum scripserit, ipse non bene satis loqui Latine videatur, cujus ingenii acumen constare inter omnes audio Italiam admiratam esse? *Antonius*. Non est enim, Alexander, eadem ratio scribendi, quæ præcipiendi. * Conabatur Valla vim verborum exprimere, & quasi vias, sed eas non rectas tradebat ad structuram orationis; in quo tamen, & inquinatam dicendi consuetudinem emendavit, & multum adjuvit juventutem. Sed est certe alia scribendi ratio, quæ a Valla, aut prætermissa est, aut ignorata. Florens enim ille, & suavis, & incorruptus Latinus sermo postulat sane conglutinationem, & comprehensionem quandam verborum, quibus conficitur ipsa concinnitas ad sonum. Sed de his alio loco commodius inter nos, si vobis placebit, disputabimus. Potest enim aliud vobis, ac mihi videri. Nunc ad reliquos pergamus. *Alexander*. Nobis vero nihil poterit esse jucundius. *Antonius*. In aliquo igitur numero fuit ² ANTONIUS PANORMITA, homo doctus, & Juris bene

* Hic locus citatur, ac probatur a sæpe laudato Viro Apostolo Zeno T. XI. Ephemeridum Litteratorum Ital. pag. 315.

² Judicium Jor. Matthæi Toscani de ANTONIO PANORMITA Siculo, Etonia equestri familia nato, est, eum fuisse sua tempestate omnium clarissimum, ejusque carminis cateraque opera doctorum manibus teri. (Pepl. It.) De eo testatur Jovius, quod quum esset moribus, ac litteris præstantissimus exornatus, quum Philippo Mediolanensium Principe fertilis ingenii industriam obtulisset, tanta liberalitate susceptus est,

bene peritus. Diligenter etiam satis loquutus est, & ut esset paullo politior, elegantiam sermonis Plautinam volebat imitari, sed ab eo aberat illa orationis integritas, ac sententiosa concinnitas: itaque sunt Epistolæ ejus languidiore. Fuit tamen perargutus Poëta, & illis temporibus non contemptus; nam is primus versus ad mensuram quandam, numerosumque sonum revocavit; antea enim fractis, concisisque numeris parum admodum versus a plebeiis rhytmis differebant; quamquam ejus fere tota Poësis est obscena. Sed polite, & eleganter problemata Plutarchi: Jo: PETRUS Lucensis Latinis litteris mandavit. Tum etiam Latine Lucianum explicaverunt ¹ RINUCCIUS, & ² CHRISTOPHORUS Romanus. Atque ego in ipsis, atque in aliis, quos enumeravimus, intelligo homines libentius ad interpretum munera esse conversos. Sed nos tamen colligimus omnes, ut appareat quam multi scribendi cupiditate flagrarint. *Alexander*. Cur nam erat istud quæso? *Antonius*. Quia veluti tum nascentibus litteris

ut Principem noscenda historia cupidum, familiariter doceret, & publice ostingentiis annis aureis elegantiores litteras profiteretur. Scripsit epistolas candidiore stilo, sed maxime juremto. Obiit diem suum Neapoli an. 1471. Luculenter de Pánormita. Cl. Zeno addit. d. T. XIV.

¹ Num PETRUS NUCETUS Lucensis, a Francisco Robortello *Vir doctissimus, & nobilissimus* appellatus? Vide Robortelli Adnotationum in varia loca Librum 2. ubi ita de Nuceto: *Profitebatur ille Græcæ, & Latinæ litteræ, publiceque interpretabatur Luca, quo tempore florebat Florentia Politianus (æquales enim ferme fuerunt) summæ tum laudis in Gymnasio, &c.*

² De RINUCCIO plura inter Ephemer. Litteratorum Italiæ Tom. XXI. pag. 362. Hunc alii Florentinum dicunt, alii Castilionensem nescio an nomine, vel patria, sed Thessalum nuncupare debemus.

³ CHRISTOPHORUS PERSONA, Romæ inter D. Estlinæ familes in Aventini Montis Cœnobio Prior, obiit 1486 de quo vide Jovium in Elœ. Nunquam vero compertum mihi est Rinuccium, ac Personam Lucianum explicavisse.

teris sibi ipsi diffiderant; & erant tanquam anniculi infantes, qui nonnisi in curriculo, aut præeunte duce inambulant. Itaque cum esset facilius illud vertendi munus, bene de posteris suis mereri videbantur, si tam multa adjumenta ingeniis supeditarent. Sed ecce multi uno tempore fuerunt, ¹ LEONARDUS DATUS, ² BARTHOLOMÆUS FACCIUS, ³ LAPUS FLORENTINUS, ⁴ PETRUS MONTOPOLITA. Quanquam ex iis alius alio plus habuit, vel ingenii, vel industriæ; omnes tamen ad amplitudinem nominis pervenerunt. Ex his Faccius Commentarios scripsit rerum ab Alphonso Rege gestarum. Tum etiam ⁵ GREGORIUM TIPHERNATEM Poëtam, & doctum, atque diligentem hominem in dicendo constat fuisse. Hujus auditor fuit ⁶ GEORGIUS MERULA, quia

¹ LEONARDUS DATUS Canon. Flor. & Secr. Apostolicus floruit prope an. 1466. in quo a Matthæo Palmerio mittuntur ei Libri Civitatis Viæ, ut patet ex Epistola nuncupatoria ejusdem. Anno vero sequenti Episcopus Massæ creatus est. Confunditur a nonnullis cum Leonardo Dato Magist. Gen. Ord. Prædicatorum, qui obiit an. 1415.

² Memoratur BARTHOLOMÆUS a Jo: Matth. Toscani tanquam Vallæ, cujus temporibus floruit, perpetuus hostis, in quem & Orationes scripsit. V. Pepl. Ital. At Jo: vius; Hun. *Spedia intimum Lunensi in portu Liguria oppidum protulit, utriusque Lingue peritit insignem.* Obiisse creditur circa annum 1460. Vide quæ Jac. Gadd. de Script. non Eccles. T. I. quæque Cl. Vir Apostolus Zenus in Ephemer. Litter. It. T. IX. eruditissime disserit.

³ LAPUS nempe a CASTILIONCHIO appellatus, quem alterius Lapi clarissimi fuisse nepotem author est Franciscus Bocchius iniquens: *Fuit præterea alter Lapi, Averardi filius, Lapi superioris nepos, in ro ingenio præditus, litterisque nobilibus ornatus. Hic doctrinam multiplicis generis edoctus, cum Linguam Græcam, & Latinam egregie didicisset, ex Plutarchi Græca Lingua XII. Vitas virorum clarissimorum in Latinam Linguam multo labore, multaque industria convertit.* Vide Franciscum Philadelphum in Epistolis.

⁴ PETRUS patria Montopolitanus in Sabinis claruit Romæ Orator celebris, ac Poëta temporibus Pomponii Læti.

⁵ Hujus doctissimi Viri munere reliquam Strabonis partem, quam Guarinus non attigerat, in Latinum splendide tractatam legimus. Jov.

⁶ Jov. in Elog. In GEORGIO MERULA ab aquis Statiellix, Alexandrino, ingenium subagresse, atque ideo ad incubationum labores maxime validum, nullisque olivæ volupta-

quia nobilitate floruit discipulorum. Et ¹ ANTONIUS TUDERTINUS non tam scribendo probabilis fuit, quam litteris Græcis eruditus. ² FLAVIUS enim BLONDUS sine Græcis litteris persequutus est Historiam diligenter sane, ac probe, eamque distinxit, & rerum varietate, & copia valde prudenter. Admonere enim reliquos videtur, ut majori artificio, ac illustrioribus litteris Historiam aggrediantur. In exco- gitando tamen quid scriberet, omnibus his viris, qui fuerunt fere ejus æquales, meo quidem judicio præstitit. Iisdem etiam temporibus ³ FRANCISCUS PHI-

luptatum illecebris, laceffitum emieuit, passim florentibus Græcarum litterarum studiis, quarum felici societate antiqui decoris ornamenta Latina facultati tradebantur. Ob id varia eruditionis laude celebratus, quadraginta amplius annos cum Venetiis, tum Mediolani juventutem docuit: in alienos sæpe Libros censuram exercens. Edidit etiam translationem Dionis de Trajani gestis: sed petenti Ludovico Sfortia Historiam perscripsit, Vicecomitum Principum origines, & bella continentem, sobrio quidem stilo, ac ex omni parte Latino, sed in quo lectores minus austeri peramana diverticula passim requirant. Cæterum postremi ejus Historia Libri meo judicio jucundiores, æternum dormisuri, denegata luce in abditis seriniis jacent.

¹ Citatur hic locus in Ephemerid. Litterat. T. XV. pag. 312. Judicium de Tudertino, quod edidit præceptor ejus Fr. Philolphus hoc est: *Lapus Florentinus, ut alias item nonnullas, quas Vitarum index aseribit ANTONIO TUDERTINO, qui, etsi ipse quoque auditor fuit meus, erat tamen Lapo illo longe inferior & ingenio, & doctrina, ac dicendi vi ac facilitate (in epist. quadam.) Simile illud est Cardinalis Papiensis scribentis: Antonius Tudertinus ita inepte plures traduxit (nempe Vitas ex Plutarco) ut nullas legere præstet, quam illas (in epist.)*

² Foroliviæ natus est BLONDUS Anno D. 1588. Eugenii IV. Pii II. aliorumque Romanorum Pontificum Secretarius fuit. Obiit Romæ 1463. *Is magno ausu, singularique industria, nec infelici eventu multorum annorum intermorientes res gestas & tenebris excitate orsus, Decadas conscripsit, quibus ab inclinante Romano imperio funesta tempora, ac ideo veritatis lumine orbata in lucem proferuntur. Jovius in Elog. Historiographus insignis, ingenio excellens, eloquioque disertus vocatur a Trithemio: Ad honorem Blondi, ita Gerardus Vossius de Hist. Latinis, non parum pertinet quod scripta illius in Epithemen contrahere dignatus sit Pius Pontifex. Dissione est non admodum culta, ut etiam Volaterranus agnoscit, sed de antiquitate tamen, utcumque interdum aliquid humani patiat, sane pro ætate, qua vixit, optime meretur. V. Ephemer. It. T. XII. ubi multa de Flavio Blondo.*

³ PHILELPHUS Patria Tolentinus natus est anno 1398. Eques aureatus, & Poeta laureatus fuit. In Archivo enim Gen. Flor. (Rog. Ser-Matthæi Cenni Ajuti) le-

PHILELPHUS non indifertus putabatur; ¹ habebat a natura ingenium vagum, multiplex, volubile. Exstant ab eo scripta & Poëmata, & Orationes, sed ut vita, sic erat in toto genere varius. Fuit is a puero litteris Græcis bene doctus, & horum studiorum causa est ab eo tota pæne Græcia peragrata. Ex quo ² tanquam ex dotali hereditate legatas testamento Græcæ litteras acceperit: multumque etiam ei profuit Chrysolora ejus socer. Sed erat vendibilis sane scriptor, & is, qui opes, quam scribendi laudem consequi malebat. Constat enim neminem Principum illis temporibus in Italia fuisse, quin adjerit, quin eum scriptis salutaverit, ut ex his pecuniam crueret. Sed ut ad quæstum diligens, sic erat

legitur: An. 1481. *Famosissimus vir D. Franciscus Philelphus Miles, ac Poëta laurentus facit procuratorem Franciscum de Tolentino nepotem suum Cancellarium Ducem, &c. Floridus Sabinus Apolog. in Calumniat. hæc ait: Franciscus Philelphus multa scripsit ut Orator, & Poëta; de ejus Epistolis, Dialogis, & Orationibus, aliisque soluta orationis monumentis diversa sunt doctorum sententia. Plurimi enim judicium ei defuisse volunt: alii tumidum eum plenumque; alicubi exilem, persæpe aridum, jejunumque arbitrantur, licet sibi vel maxime placentem; doctus tamen fuit, & magna auster. Author noster de Card. pag. 63. vocat Philelphum Poëtam, ut illa ætate heroico sono, & dithylica exaggeratione grandem. Obiit An. 1481. sepultus in Aëdo D. Annunciatæ. Bartholomæus Fontius in Annal. suorum temporum MS. Biblioth. Riccardianæ: 1481. Franciscus Philelphus vir Græce Latineque doctissimus e Mediolano Florentiam accitus ut publice profiteretur æstu, ac labore itineris confectus pridie Kal. Augusti Florentiæ moritur anno ætatis quinto, & octogesimo. Cujus nos in vicem suffecti sumus. Luculenter Ap. Zenus T. XIV. Ephem.*

¹ Ad omne genus scripti sese accommodavit, ac ut de Vinicio dicit Augustus, ingenium in numero habebat; Græcæ, Latine, Lyricæ, Heroicæ, Profram orationem ex tempore distabat. Volaterran. in Anthropol. l. 21.

² Hic Emmanuclis Chrysoloræ filiam uxorem duxit, quæ Græcæ elocutionis magistra, quotidiano usu Atticorum accentuum, inepto, sed docili conjugis ori dulcedinem instillaret. Narrat Jo: Matthæus Toscani, hunc cum Timotheo Græculo quodam de syllabæ quantitate datis pignoribus aliquando contendisse, victoremque victo barbam ex pacto abstulisse; quamvis Timotheus eam pecunia redemptam cuperet, quod ab inexorabili adversario nequaquam impetravit.

erat in largitione effusus. Hujus Filios ¹ XENOPHONTEM, & ² MARIUM ingeniosos, & sane eruditos dicunt fuisse; quorum Marium tantam habuisse memoriam, quanta in viro cognosceretur. Horum majus omnino nomen exstaret, nisi pater præclussisset eis iter gloriæ. *Alexander.* Mihi vero ille (patrem dico) hoc facio sapiens videtur, qui ex litteris divitias quæsierit; propterea quod eloquentia quo major est, eo hominibus invisior, ac suspectior. *Antonius.* Sed quis vestrum ex majoribus natu multa de ³ PORCELLO non audivit? immo vero, quis ejus scripta non legit? Is sive doctrina homo ignotus, sive ingenio, ad summam nominis famam pervenerat. Ex quo intelligi potest quantum fuerit ex omni numero Poëtarum paucitas. Hexametri enim ejus, quos legimus, non illi quidem politi sunt, nec festivi, nec molles; grandes tamen, & graves imperitis videri solent: ab eruditioribus vero respuuntur, quod turgeant, & inflati sint, nihilque afferant præter æqualitatem. Caruit

E omni-

¹ XENOPHONTI PHILELPHO plures Epistolas mittit Franciscus pater, quæ inter ejusdem epistolas leguntur.

² MARI PHILELPHI Francisci filii Epistolar. opus editum est Mediolani 1489. Venetiis inde 1492. Huc plures Epistolas Franciscus pater scribit, inter quas una exstat, dat. an. 1441. in qua Theodoræ Chrysolorinæ uxoris mortem filio nunciat.

³ PORCELLUS Poëta fuit, & Historicus Neapolitanus, qui floruit sæculo decimo quinto, ut patet ex Epistola a Francisco Philelpho ad eum missa an. 1456. Exstant ejusdem Commentaria secundi anni de gestis Scipionis Piccinini exercitus Venetorum Imperatoris in Hannibalem Sfortiam Mediolanensem Ducem ad Scenissimum Principem Franciscum Foscar. Venetorum Ducem per Cl. Historicum, & Poëtam, Laureatum Porcellum Neapolitanum. Deploratio Italia poscentis pacem a Divo Paulo II. P. M. atque Porcellii Poëta Laureati Epigrammata. Sed ut ad rem redeamus, discrepat ab judicio Cortesii illud Poggii Florentini, Laurentio Vallæ ita loquentis: *Cui non & his addidisti Virum doctissimum Porcellum, qui tot versus in tuam fultitiam, & mores reprobus scripsit elegantissime?* Vide Ephemer. Litterat. It. Tom. IX.

omnino varietate hæc ætas; quanquam hic quidem nonnullis visus sit distinctum illud & florens Virgilianum Poëma præclare effinxisse; hi tamen mea sententia longissime a vero judicio absuerunt. Nec refert alieno ornatu, & quibusdam luminibus, ac quasi insignibus nostra scripta explere, nisi queamus id distincte, apteque facere. Fit enim nescio quid monstruosum quum membra cohærentia male, dissipantur. Modo enim hoc scribendi genus magnificentius renovatum est, & cognita primum numerorum varietas a ¹ PONTANO principe hujus memoriæ doctissimorum hominum: qua sane & occurritur fatietati, & nitidum illud struitur, & lætum genus, ac politior illa elegantia hilaritate quadam aspersa conditur. Tum etiam nomen magnum, & doctrinam ² SIGISMUNDO MALATESTÆ defuisse ferunt. Habuit hic, sicuti semper audivisse vos arbitror, multa contraria, & diversa inter se naturæ studia. Fuit in illo magnum ingenium, fuit tanta industria rei militaris, quanta in homine quoquam; sed illud

mi-

¹ JO: JOVIANUS PONTANUS Cereti in Umbria natus obiit an. 1505. ætatis an. 78. *Vir memoria quidem nostra* (inquit Alexander ab Alex. l. 1. c. 1.) *omnibus bonis artibus, atque omni doctrina præditus; cui præter ingenii mansuetudinem, qua plurima in homine fuit, munditia verborum, & compositus ille sermo ad omnem ingenuitatem plurimum accessions faciebant. Vir ad omne genus eloquentia natus a Jovio appellatus est, & eo maxime, quia asserit Lilius Gyraldus, hunc in magnis Regum, & Principum negotiis diu versatum, modo bellorum, modo pacis condiciones, & fœdera tractasse, non minus quam Phœbum, & Musas coluisse. Quis tamen, exclamat, eo plura? quis doctius? quis denique absolutius composuit? enucleatius? exquisitius? & licet ejus quidam hoc tempore gloria parum æqui sint affirmatores, non illis tamen ipse concedam, ni meliora vel ipsi fecerint, vel ab aliis facta attulerint, id quod ad hanc ipse diem non vidisse fateor.* Dialog. 1. de Poët. nostr. temp.

² De eo sic Author in Lib. 3. de Cardinalatu pag. 220. *At si historia est notitia eruentis occultior, ut ad concionis usum exempla sumantur, quis dubitet, quin sint Sigismundus Fulginas, Bernardus Oricellarius, & Gbilius Mediolanensis accersendi?*

mirabile : stare pari fastigio in utraque fortuna, multos devincire consuetudine, appetere inimicitias, clarorum hominum modo astringere, modo laxare voluptates, inter ipsas minime negociorum oblivisci, minime famam aspernari, minime intermittere studia doctrinæ. Sed ¹ Pius SECUNDUS in primis disertus habitus est. Is diligentia parentum a puero eruditus multa celeriter ingenii, ac doctrinæ signa præbuit. In quo viro, Dii immortales, quanta diversa inter se studia fuerunt virtutum incredibilium! Mitto hominem artibus rerum bene gerendarum instructum; mitto Pontificem maximum: quis in dicendo vehementior? quis in Historia pressior? quis in Poëmatiis dulcior? quis in docendo copiosior? Exstant ejus Orationes amplius triginta, plenæ illæ quidem & argumentorum, & exemplorum. Idque eo fuit admirabilius, quod incommoda esset valetudine, ac semper maximarum rerum curis obrueretur. Erat in refellendo argutus, in probando subtilis; tenebat memoriam rerum Christianarum, adjunxerat etiam studia Philosophiæ: quæ omnia oratio referta sententiarum luminibus commendabat. Accedebat actio liberalis,

E 2

gc-

¹ Parcissimus in PII SECUNDI laudibus fuit Jo: Matthæus Toscani, inquiens, cum Oratorem suo sæculo non incelebrem, & veri satis amantem Historicum haberi meruisse, neque a Poëscos cultu ejus ingenium abhorruisse. At revera vir fuit doctissimus, & eruditissimus, quem meritum, & doctrina singularis super Varicani culmina constituere. Is quidem in ipsius Pontificatus curis Musis ac Genio animi causa locum dare solebat. Patria fuit Senensis Æneas Silvius Piccolomineus appellatus. Multa ingenii sui monumenta reliquit, de quibus disertissime in Ephemer. Litter. Ital. T. XIV. Vide etiam Campanum in ejus Vita, qui scribit decessisse Pium ætatis annorum 59. an. 1464.

gestusque & venustus, & gravis. Licet enim hunc prope solum Oratorem ex hac acie doctorum adducere, cui natura pariter, & doctrina inservierint. Nihil de ejus consiliis, nihil de rebus gestis, nihil de animo, nihil de fortuna, nihil de gloria, nihil de religione hoc loco quærimus. De eloquentia loquor. Hoc in homine unam tantum Latini sermonis integritatem desiderarim. *Paulus*. Jure mehercle hunc laudas, Antoni. *Antonius*. Prudentum etiam, & eloquens fuit ¹ DOMINICUS Pontifex Brixienfis, cujus exstant Orationes. Ac ejusdem quoque ordinis erat ² JO: ANDREAS ALERIENSIS; homo plane doctus, sed toto genere horridior, ac præfractior. Ornandus est hic profecto eximiis laudibus, quod in emendandis voluminibus tam multam operam posuerit. ³ JOHANNES BASINIUS Poëma fecit molle, & facile. ⁴ ROBERTUS autem VULTURIUS Ariminensis, in eo libro, quem de re militari, & bellicis instrumentis scripsit, ostendit ille quidem satis ingenii, sed multo magis diligentæ, nec minimum

¹ DOMINICUS DE DOMINICIS Venetus Torcellii antea Episcopus. *Hic Vir, Ferdinando Ughellio teste, ob raram doctrinam apud omnes ordines celebris fuit, ut præfatus Patres prope modum videretur aquare, Paulo II. Pontifice ita censente, ad Brixiensem sedem translatus est anno 1464.*

² JO: ANDREAS ALERIENSIS notus est vel ex Epistolis Francisci Philæphi, qui eadem ætate vixit.

³ JO: BASINIUS Parmensis inter Poëtas adnumeratus. Floruit dimidio sæculi XV. Malatestis Ariminensibus carus. Hujus Carmina excusa fuere Parisiis apud Simonem Colinæum an. 1539.

⁴ Seu VULTURIUS, ut ab aliis vocatur. Jo: Matth. Tosc. *Hunc Ariminensem fuisse arbitror authorem præfati illius Libri, quo veteres Græcorum, & Romanorum bellica machina accuratissime conquisita describuntur, oculisque legentium representantur. Vixit Sigismundo Malatesta Ariminum tyrannide opprimente. Obiit ætatis anno- rum 70.*

mum eloquentiæ. *Alexander*. Multum isti Basinio sane debemus; sed vereor ne dum multa emendare voluerit, multa depravarit. Modo ista diligentius, & ratione certa, non conjecturis emendantur. *Antonius*. Sed veniamus aliquando ad eum, quem mihi non licuit, per istos nominare. Traxit me ita ordo, seriesque rerum, ut tanquam in visu inhæserim, nec potuerim me citius explicare. *Alexand.* ¹ ANTONIUM scilicet CAMPANUM dicis. *Antonius*. Istum ipsum. *Alexander*. Hoc in viro primum apparuit florentius, ac splendidius quoddam orationis genus. Scribebat facile, sed studiorum laborem ferre non poterat; quod sæpe fere contigit uberimis ingeniis. Habebat delectum illustrium verborum; erant sententiarum ornamenta, sed fortasse multa interdum, & præsertim in Historia; in qua tam multa est sententiarum continuitas, ut obtundat potius animos, quam delectet. Orationes vero ejus valde probantur. Declarant enim & ubertatem ingenii, & vim quandam naturalem multis esse oratoriis laudibus excultam. Utebatur facili, & ita candido quodam scribendi genere, ut numeris quibusdam adstrictus fluere videatur. Quanquam numerus orationis abest ingeniis nostris: ita tamen imitandi quadam industria orationem inflexerat ad
so-

¹ ANTONIUS natione CAMPANUS, quem humili loco natum refert Gyraldus, Poëta fuit, teste eodem, nobilissimus. De eo vide Paulum Jovium non tam Politiani, Latomæ, Platinæ calamis laudantem, sed proprio etiam ore, quum is ostenderit Campanum Pii Pontificis gratiam studiorum similitudine promeruisse. Plura apud Cl. V. Zenum T. XII. Ephemer. Litt. It. ubi Episcopum Crotoniensem, & Aprutinum, Campanum invenies, qui decessit an. 1477. quadragenario major.

sonum, ut cadat plerumque jucunde, & numeroſe.

Alexander. Sane quidem, ſed iſtum unum de ſuperioribus vehementer probo. Sed eſt quædam de numero non parva dubitatio. *Antonius*. Quæ tandem?

Alexander. Adhibendus ne ſit orationi numerus. *Antonius*. Clariffima de re dubitas.

Alexander. Quin etiam ipſemet in multos jam sæpe incidi, qui omnino exiſtimarent M. Tullium nullo in oratione numero uſum fuiſſe: ſed iudicio tantummodo aurium inſerviſſe. *Antonius*. Quid

tam perverſum eſt iudicium iſtorum hominum, ut in eo nullum eſſe numerum affirment, quum tam multa præcepta de orationis numero reliquiſſe videant? Mea quidem ſententia eſt, orationem Latinam numeroſa quadam ſtrudura contineri oportere; quæ adhuc omnino a noſtris hominibus ignoretur. *Alexander*. Ego proſecto aſſentirer tibi libenter, Antoni, ſi quales hi ſint, quid inter eos, & poëticos numeros interſit cognoſcerem. Neque enim ego in oratione, æque atque in carminibus numerum facile perſpexerim. *Antonius*. In diffi-

cillimam diſputationem me revocas, quæ non eſt proſecto huius temporis. *Paulus*. Noli, quæſo, Alexander, perturbare ordinem inſtituti ſermonis; nam id, quod quæris de ratione numerorum, artis eſt intimæ, & liberam quandam ceſſationem poſtulat. Tu vero, Antoni, perge ad reliquos. *Antonius*. Sed revertamur porius ad eum ipſum Campanum. Is enim meo iudicio ceteris exemplo eſſe poteſt, quam

pa-

parum oblit ad virtutem comparandam obscuro loco nasci. Nota res est. Dicunt enim quum puer ob inopiam oves pasceret, abductum esse eum a patruo prædito sacerdotio, ut tener sacris ad rem divinam imbueretur; tulisse id permolestè patrem, qui inops esset, & rusticus, ac iussisse statim puerum ad oves reverti: impetratum tamen precibus fuisse, ne pasceret, atque alium a patruo in pueri locum surrogatum: adolevisse apud patrum optima spe, & docilem puerum, tantosque progressus brevi tempore effecisse, ut jam gravioribus artibus applicaretur. Inerat profecto in hoc homine ingenii celeritas quædam, ut quod semel, aut iterum vidisset, arriperet; quod etiam indicant ejus Epigrammata, festiva illa quidem, & plenissima argutiarum. In multos cavillosus est bellissime, & facete. Nam in omni etiam sermone dulcem eum fuisse, & perurbanum ferunt. Eodem in numero habitus est
 * NICOLAUS PEROTTUS, litteris doctus Græcis, & Latinis. Hujus in Orationibus sermo est non inquinatus, & multa habet oratoria ornamenta. Scripsit etiam pleraque toleranda. Is adversarium, & obtreclatorem

* NICOLAUS PEROTTUS ex Lentino Umbriæ Oppido, hodie Saxoferrato, Græca Latinæque litteratura juxta clarus, Archiepiscopatum Sipontinum ob doctrinam, & virtutem meruit; in quo munere recte administrato, extrema jam senectute obiit (nempe an. 1480.) apud Villam Euguram ab ipso domino nomen sortitam. Hujus ex effigine prodit Cornu Copia, sive Latina Lingua Commentarius, Liber omnifaria eruditione repletus, cujus Lectorem nunquam collocata in eo opera ponit. Quibusdam etiam aliis Libellis rem Grammaticam juvit, & Polybrum Latino eloquio expressit. Ita Toscanus. At a Paulo Jovio accepimus. Nicolaum Romæ Græcas litteras pertinaci studio consecratum, & a Cl. Zeno a Secretis fuisse Eugenii IV. Nicolai V. & Callisti III. qui per litteras suas dat. 1456. Poëtam laureatum vocat.

rem suæ laudis habuit * DOMITIUM CALDERINUM, qui quum esset ingenio peracri, & flagranti studio, neminem secum instituendi, ac scribendi gloria conferendum putabat; exagitabatque omnes, in quibus aliqua maxime apparerent doctrinarum signa: sed breve tempus fuit fructuum ingenii percipiendorum. Erat is in reconditis abstrusisque rebus explicandis subtilis, & acer, & ingenio tanto, ut siquid interdum falsi diceret, aut novas opiniones infereret, aut conaretur evellere insitas, ita quibusdam rationum integumentis adumbraret, ut consensu multitudinis verissime dixisse putaretur. Itaque quum sibi omnia his ingenii præsiidiis ascisceret, magnam diuturnamque invidiam conflagavit; quanquam habet pertinaces quosdam sui amatores. Hujus oratio elegans est, & plane erudita: verborum, & sententiarum multa lumina: quod proposuerat ingeniose imitabatur. Laudandus hic unus est, cui si vita suppeditasset, majorem omnino gloriam esset consequutus, quam quæ ex umbratili ludo quæri posse videatur. Is diu Romæ * THEODORO GA-

1 *Calderia Veronensis Agri oppidum, calidis aquis nobile DOMITIUM (proprie vero Domiticum) protulit. Eum acri, flagrantique ingenio ad gloriam anhelantem Bessarion Cardinalis excepit, & extulit. Exinde, quum Roma profiteretur, & obscura sensa duriorum Poetarum admirabili recondita lectionis testimonio dilucidasset, litterarum splendoris assertor, ac omnis obscuritatis acclamatus est. Vide plura in Pauli Jovii, ac Jo: Matthæi Toscani Elog. Causam vero similitudinis Domitii habes in Ephemer. Litter. Ital. Tom. XIII. ubi fuse de Sipontino disseritur.*

2 De THEODORO GAZA v. de sis quæ author de Cardinal. pag. 235. ait. Hic Theffalonicæ honesto loco natus, Amurathe Græciam omnem victricibus armis quatiente, in Italiam venit acumine, fertilitateque ingenii nemini secundus, ut ait Jovius: Johannes Pierius Valerianus ita de Theodoro: *Tanta eruditionis Vir, quanta multis ab hinc annis nemo Græcorum, dicere ausim etiam & Latinorum, fuit.*

GAZÆ dedit operam, cum summo Philosopho, tum gravissimo scribendi magistro. *Alexander*. Recte dicis, Antoni; nam Domitius quicquid habuit (quantum ego a majoribus accepi) ex Theodori doctissimi hominis disciplina hausit: cujus quidem beneficii omnino immemorem dicunt fuisse. *Antonius*. Ego vero sic existimo Theodorum unum e multis laudandum esse, & in eo primum cum summa philosophia, summam eloquentiam conjunctam: nec erat is in eorum numero, qui usurpatione disciplinæ, verbis magis quam vita Philosophiæ studia persequuntur. Ut enim ei ingenii, & eloquentiæ, sic humanitatis, innocentia, ac omnium virtutum primæ deferebantur. Erat in scriptis summa gravitas, erat profluens sine molestia ubertas, candor autem latini sermonis, & splendor tantus: ut non modo acuere industriam, sed etiam alere quibusdam orationis nutrimentis ingenium potuisset. Jure igitur totius Italiæ consensu a doctis est princeps judicatus. *Paulus*. Istius vero quantum ego intelligere possum, cum magna ingenii gloria, magnaque doctrina, qua in omnibus unus excelluit, tum egregie acta vita laudatur. Ex quo intelligi maxime potest specimen solidæ gloriæ nonnisi in perfectione virtutis solere existere. Me autem non tam ipsa studiorum gloria, quam bonæ existimationis fructus delectat. *Antonius*. Merito te iste fructus delectat. Sed colligamus reliquos. Nam cer-

te ¹ BESSARION Cardinalis NICÆNUS plus dignitatis attulit Reipublicæ Christianæ, quam quod ex eo speraretur. Præbuit enim se magnum virum quum contentiones inter Græcos, & Latinos sunt dijudicatæ. Fuit is cum omni vita severus, & gravis, tum plenum, & grande est habitum ejus Græcæ orationis genus. Hujus domus quasi nutrix quædam fuit omnium magnarum artium. Disputabant eruditi homines toto die maximis de rebus. Ipse grandis natu in utramque partem cum refellendo, tum probando respondebat. Nec enim tanta mens, nec tanta vis ingenii quotidianis quæstiunculis satiari poterat; legebat ipse multum, scribebat, meditabatur. Exstat ab eo liber defensionum Platonis omni doctrina refertus. Multum etiam gloriæ est consequutus ² JOHANNES ARGYROPYLUS Byzantius, prope-

¹ BESSARION TRAPEZUNTIUS, Græcus Asiaticus, Monachus S. Basilii, Archiepiscopus Nicænus, Byzantii Patriarcha, Presbyter Cardinalis SS. Duodecim. Apostolorum, postea Episcopus Cardinalis Tusculanus: *Hic, ut author est Ciacconius, in utraque Lingua Græca, & Latina peritissimus litteratorum, & prudentum hominum amicissimus fuit, quos domi sua convenientes humaniter suscipiebat, & privatis disputationibus singulis diebus alebat, & fovebat. Maximus, & acerrimus Eidei Catholica defensor fuit; ipse enim ex Græcis primus in Concilio Florentino, in quo conciliata fuit Græca cum Latina Ecclesia, confessus fuit articulum illum de processione Spiritus Sancti simul a Patre, & Filio tot seculis inter Græcos dubium. Ravenna maximo omnium dolore obiit. Romam ejus cadaver translatum, sepultum fuit in Basilica XII. Apostolorum in sacello a se constructo, Platina in ejus funere orante, cum Epitaphio a se ipso an. 1466. posito.*

² De JOHANNES ARGYROPYLO vide Papadop. Hist. Gymnas. Patav. afferentem, hunc nobili genere Constantinopoli natum esse. Jovius vero Joannem apud Cosmum Medicem gloriosa liberalitate litteris faventem in honore fuisse ait, tantæque nominis exsultationis, ut is Petro filio, nepotique Laurentio præceptor datus, loco parentis haberetur, publice vero Florentina juventuti Græcos authores enarraret. Grati idcirco animi erga Medicæ gentis proceres vigiliarum præclara extant monumenta, consecra-

perfectus Peripateticus, & sane tolerabilis scriptor. Is cum bello Byzantino domo pulsus in Italiam venisset, multos docuit ex nostris hominibus, qui admirabili fama doctrinæ compulsi, se in ejus disciplinam tradiderant. Hujus auditor fuit ¹ DONATUS ACCIAJOLUS, homo non indifertus, & ipso orationis genere copiosus. Multæ fuerunt in hoc viro literæ; multa non philosophiæ solum, sed priscarum etiam rerum cognitio. Fuit in illo præter studium doctrinæ, & facilitatem naturæ, summum ingenium, summa ratio, consideratissima prudentia. Erat quædam orationis sanitas, cum coloris bonitate; non medicamenti quæsitus, & fricatus candor. Doctus item ex eadem disciplina ² MATTHÆUS PALMERIUS fuit, qui conservatis temporum ordinibus multorum annorum memoriam breviter, & accurate complexus est. Sed nihil tamen ad Donatum, sed po-

F 2 tius

serata in ea domo altrice vera virtutis. Aristotelis enim naturalia, atque moralia, generose transfudit; ita applaudente Gaza vetere sodali, qui diversas Aristotelis partes vertendo desumpserat, ut quadam ab se pariter translata combureret, ne amicissimi hominis crescenti fama officerent, si ad amulationem odiosa comparatione certaretur. Floruit deinceps Argyropylus (ita Papadop.) Florentia summa existimatione doctrina. Deceffit Roma septuagenarius anno 1486.

¹ Multa non philosophiæ solum, sed priscarum etiam rerum cognitio. Idipsum, teste Francisco Bocchio, indicat Volumen, quod suo nomine Iohanni Oricellario dicatum est de natura virtutis, & vitii. Idipsum ex Moralibus Aristotelis luculenter apparet, quibus DONATUM erudita, & pereleganti commentatione magnum lumen attulisse judicatur. Convertit e Latino in Tuscum sermonem Historiam Leonardi Arretini, & e Græco duas Plutarchi Vitas. Natus est nobilibus parentibus Flor. an. 1449. mortuus est quum annum quinquagesimum attingeret; conditusque Carthusiano in Templo. Laudavit eum pro concione Christophorus Landinus.

² Ita Toscanus: *Pari felicitate Latina, atque Etrusca carmina facientem, Florentia tot ingeniorum mater in lucem dedit. Extat & ejus Historia Pisana, & Supplementum Chronicorum Eusebii.* Obiit Florentiæ an. 1475. ut patet ex Bartholomæi Fontii Annalibus, quos una cum Chronicis Palmerii in lucem propediem prodire, speramus. Vide Ephemer. Litterator. Ital. T. X. atque Ephem. Litterat. Europæ Jo: Angeli Tom. 2. p. I. pag. 80.

tius ad antiquorum consuetudinem, & inscitiam. Nam ¹ BARTHOLOMÆUS PLATINA erat cum omni victu, atque cultu, tum oratione temperatus, & lenis, & ut ita dixerim, frugi, atque integer. *Paulus*. Ita prorsus est. Memoria teneo, me puerum, quum ab ² ALEXANDRO fratre, & ³ L. M. PHOSPHORO, quem ego secundum fratrem diligo, deducerer ad Platinam, multa ab eo memoriter, & sapienter dicta audire solitum; atque adco omni ejus sermone delectatum, ut quantum illius ætatis judicium patiebatur, non dubitarem, eum unum inter multos sapientissimum appellare. Erat enim is cum sermone comis, & perurbanus, tum magna corporis præditus dignitate; vox canora, status, incessus, omnisque corporis motus liberalis. Itaque ut nobis pueris opinio

¹ Compluribus aliis documentis, quæ perspicue evincunt PLATINÆ Cremonensi BARTHOLOMÆI nomen fuisse, de quo addubitare videntur Gerardus Vossius, Paulus Jovius, Jo: Matthæus Toscani, aliique, ad censendum est hoc Pauli Cortesii indubitabile testimonium, utpote Viri, cui, simul ac fratri suo Platina optime cognitus erat. De eo Erasmus in Ciceroniano: *In Historia valiturus erat si nactus fuisset argumentum felicius. In optimo cive, & panegyrico nonnihil accedit ad Ciceronis imaginem, sed tanto intervallo, ut hoc nomen non promeretur eruditorum calculis: aliqui vir doctus, facundus, & ni fallor, bonus.* Jo: Matthæi Toscani tale judicium est: *Platina quanta potuit industria, eloquio tamen incompósito Pontificum Romanorum Vitas exaltius, quam ante illum ceteri, absolvit.* (Pepl. Ital.) Illud Floridi Sabini est: *Summorum Pontificum Vitas eleganter scripsisse, eoque immortalem sibi gloriam peperisse.* Obiit Romæ an. 1481. Cl. Vir Lud. Ant. Muratorius Platinæ Opus nuper edidit.

² De ALEXANDRO Cortesio hæc Gaddius: *Alexandri doctrinam, & virtutem laudat Pirus in Epistola ipsi scripta: ejus versus de laudibus Matthia Regis laudantur a V. Obsopæ ob eruditionem, & ingenium singulare Poëta, quem indicat eum præficus Poëtis numerandum fuisse, si ad justam ingenii maturitatem pervenisset.* (De Scriptoribus non Eccl.) Hic fuit a diplomatibus Centumvir, atque Apostolicus Scriptor. Vide Vossium de Historicis Latinis, aliosque.

³ LUCIUS FAZINIUS MAPHÆJUS Romanus, vulgo PHOSPHORUS appellatus, vir doctrina clarus prætinetque tum Græca, tum Latina Lingua percelebris a Sixto IV. Episcopus (Signinus) adlectus est anno 1481. die 19. Mensis Augusti. Decessit autem. Roma 1503. Hic ob similitudinem studiorum Angelo Politiano, Hermolaoque Barbaro varia litteratura clarissimis luminibus familiariter usus est, ut eorundem epistola produnt. Ughell. It. Sac. Tom. I.

nio fuit plurimum cum ingenio, & doctrina valuisse; sic etiam adolescentiores cum vehementer laudandum judicabimus. *Antonius*. Sed jam ad inferiorem, si placet, ætatem veniamus, quæ certe magnam ingeniorum copiam tulit. *Alexander*. Tu vero, Antoni, ita ad hanc inferiorem ætatem properas, ut omnes jam, qui aliquam ex humanitatis studiis laudem adepti sunt, collegisse videare. Sed nescio quo pacto ¹ JACOBUM Cardinalem PAPIENSEM, & item plerosque ex veteribus præterieris. *Ant.* O singularem memoriam tuam, Alexander! At mihi iste unus in tanto numero exciderat. Nec enim ego dubito multos præteritos fuisse ex veteribus eruditos homines; sed hoc accidit culpa eorum, qui nihil scriptum reliquerunt. Diximus autem nos a principio eos in hunc sermonem relatu-
 quos aut a majoribus laudatos accepimus, aut quorum scripta in existimantium arbitrio versentur. *Paulus*. Prudentissime facis, Antoni; nam isti, qui nihil scribendo volunt videri sapere [nisi alioqui doctissimi sint, aut erudiant juventutem] nullo modo mihi placent. Odiosum sane genus hominum, & inutile videtur, non solum vivis, sed etiam posteris nocere: quum aliena lacerent, ipsi nihil audeant scribere, atque id se facere modestia, & conscientia ingenii commotos dicant: ingeniosorum quidem hominum studia retardant; At homines infamiæ

¹ JACOBUS Ammannatus Cardinalis PAPIENSIS dictus, Patria fuit Lucensis. Floruit dimidio sæculi decimi quinti. Extant ejusdem Epistolæ, ac Commentariorum Libri impr. Mediol. 1506. & alibi.

miæ insolentes, & insueti calumniarum facillime a scribendo deterrentur. *Antonius*. Merito isti nullo loco sunt numerandi, qui nihil in vita effecerunt, ut numerarentur. Sed revertamur ad nostros, & a duobus adolescentibus fere æqualibus exordiamur. *Paulus*. ¹ CAMPANINUM SEPTIMULEJUM te puto, & ÆMILIUM dicere. *Antonius*. Recte putas. Quorum alter, quanquam decennio ante mortuus est, quum alterius tamen ætate conjungebatur. Ex Platina sæpe sum audire solitus, qui se Campanino comitem in vinculis fuisse dicebat (fuit enim tum litteratis & carceris, & exilii subeunda calamitas) magnam eum in illo juvenili, & poëtico ardore spem, atque admirationem præbuisse. Sed Æmilius civis Romanus ad amplitudinem, & honores pervenisset, nisi celerius, vi, quam suo fato, concidisset. Poëmata ejus, non illa quidem nimis compta sunt, nec varia; apta tamen, & quæ naturæ viribus fulta, tanquam in herbis parva adhibita cultura, ingenii viriditatem, nondum fruges ostendant, ita ut in eo illustre ingenium appareat, artificium mediocre. Sed ne ² NICOLAO quidem VALLENSI, qui Homerum, & Hesiodum Latinis expressit versibus, poëticum ingenium defuit. Nam ut ceteri multorum sunt approbatione contenti; sic iste videtur unius Theodori testimonio aliorum judicia

re-

¹ Num. AUGUSTINUS CAMPANUS Paulo II. invisus?

² De NICOLAO VALLA ita Valer. de Litter. infel. L. 2. Inter Romanos autem paucis ante annis non ignobilis fuit Nicolaus Valla summa juvenis eruditionis, Græcis Latinisque Litteris apprime doctus, qui quidem adolescens admodum ad Homeri sublimitatem eleganti Latini carminis facilitate copulat aspirare. Is tamen nondum alterum a vigesimo egressus annum fatis quadam inclementia eruditorum omnium spei surreptus est.

requirere non debere. *Paulus*. Ego vero vehementer delector commemoratione civium Romanorum. Nam si verum dicimus ¹ nos cives Romani sumus, & duas habemus patrias; unam naturæ, juris alteram: nec plus sane debemus illi, quæ eduxit, quam illi, a qua excepti sumus. Itaque cum sexaginta jam fere annos Romæ habitaverimus, jure nostro cives Romani haberi debemus. *Antonius*. Optime facis, Paule, quod Urbi Romæ justissimas refers gratias, in qua præsertim, ² ANTONIUS CORTESIUS pater tuus magnam sit nominis celebritatem consequutus. Fuit enim ille Vir cum princeps Collegii Duodecimvirum, tum in illis litteris scribendis expeditus, & facilis; quæ quanquam inquinatæ sint, ita tamen in his excelluit, ut appareret ejus naturale quoddam bonum depravatam esse vitio corrupte loquendi. *Paulus*. Non putabam te eo sermonem producturum, ut in patrem meum incurreres. Sed gratissimum mihi fuit cum testimonium judicii tui, tum dulcior, & suavior commemoratio paternæ industriæ. *Antonius*. Nec autem ab illa poëtica laude aberat ³ JANUS PANNONIUS, quem fuisse Guarini

¹ Vide Pauli Cortesii Vitam. Hinc Prosper Mandosius Cortesios Romanos appellavit.

² Fuit Scripturariæ, ut vocant, censuræ princeps, &c. teste Jo: Vincentio Coppi in Annalib. Geminianens. Pauli vero verba hæc sunt in Libro de Cardinalatu: ANTONIUS quidem Cortesius pater meus, Duodecimvirorum Compendiariorum, & Scripturaria Censura princeps, quum præ negotiorum, interventorumque magnitudine fere semper minus prædere solere diceretur, &c. cum aliis illius temperantiam sobrietatemque ostendentibus. Libelli cujusdam auctor est, de quo vide Pauli Vitam.

³ JANUS, vel Johannes PANNONIUS Episcopus fuit quinque Ecclesiarum. Varia ejus poemata edita fuerunt Venetiis an. 1554. Plura Paulus Jovius in Elog. De eo meminit Lilius Gyraldus, atque, Eleg à potius quam heroico illum præfistisse. V. Jo: Pier. Valerian. de Litter. infel. Lib. 1.

ni auditorem ferunt : clarum mehercule Poëtam, quis negare potest? Nam ego sic existimo hunc unum ceteris superioribus poëtica gloria præstitisse. Illud certe mirabile in hoc homine fuit, quod externus, quod barbarus (quæ gens durior ad Musas videri solet) ad summam admirationem, & ingenii famam pervenerit. *Alexander*. Quid tu tantum externum effers? quasi vero iste non modo nostros omni genere laudis superarit, sed etiam a scribendo deterruerit. Si jocularis, belle mihi videris eum laudando suffragari barbaris; sin asseveras, cave ne plus quæstionis suscipias, quam possis sustinere. Eum si laudas ut ingeniosum, ac plane doctum, prorsus assentior, modo ita laudes, ne gloriam nostris præreptam velis. Nuper autem ea nostri homines agnoverunt, ut paulo ante dixisti, quæ sunt ab eo omnino ignorata, nec ipse unquam suspicatus est, quænam essent numerorum varietates. *Antonius*. Nolo me putes ambitiose loqui. Sed ANDREAM CONTRARIUM placuisse quibusdam scio; quod illa lumina Ciceronis ingeniose admodum, consecrari videretur; sed aliquanto tamen abest ab optimo genere imitandi; &, ut scite ¹ amicus noster ait; non ille quidem ut alumnus, sed ut simia effingit. Is enim ² FRANCISCO LIPPO Arretino contum-

¹ De Angelo Politiano loqui intelligo, qui Epist. XVI. Libri VIII. ait Cortesio: *Mibi vero longe honestior tauri facies, aut item leonis, quam simia videtur*. E contra vero Cortesius Politiano respondit: *Ego malo esse ascela, & simia Ciceronis, quam alumnus*.

² FRANCISCUS LIPPUS Litterarum Græcarum, ac Philosophiæ peritiâ excultissimus, Authori nostro ferme contemporaneus fuit.

meliosissime maledixit, ominatusque est illi id genus mortis (mirabile dictu!) quod postea utrique contigit. Nam Lippum Neapolim proficiscentem, in itinere ex equo præcipitem in terram delapsum mortuum ferunt; alterum etiam ex Brutiis decedentem non multo post simili prope modo cecidisse.

Alexander. O gravissimum casum duorum eruditorum hominum! siquidem ejus animus præsentiens futura, quum alteri esset ominatus, sibi non cavit.

Antonius. Atque tum etiam in aliquo numero fuit ¹ ANGELUS SABINUS Poëta, qui non satis, si non contenti, probari etiam cupiat: quanquam multa sint in eo inaniora, nihilquæ varietatis adhibeat ad permulcendas aures. Sed hæc doctorum hominum contentiones de litteris tantummodo inter se dissidentium, multum acuerent juventutem, nisi ipsi alios, aut invidere vituperarent, aut insectarentur inimice. Utilissimum certamen convertunt ad invicem, atque omnis undique concurrit ad judicandum consentiens indoctorum turba. Sed hæc si forte ad nos, nihil tamen ad institutum sermonem. *Alex.* Quid tu id ad nos? quasi vero imperitorum judicia curemus. Unus existimator bonus est mihi pro centum millibus. *Antonius.* ² MOMBRINUS mediocris in-

G

du-

¹ ANGELUS SABINUS Commentaria edidit in Juvenalis Satyras.

² Forte MAMBRINUS ROSEUS, qui de Principatu (Gabriele Naudeo teste in Bibliograph. Polit.) scripsit. Sed de BONINO MOMBRICIO Mediolanensi intelligendum suspicarer; etenim laus, quæ huic a Cortesio tribuitur, tum Mombricii ætati, tum etiam professioni respondere videtur. Editor Librorum erat Mombricius, qui ann. circiter 1475. edidit inter alia Matthæi Palmerii Florentini Librum de Temporibus, suisque carminibus illustravit.

dustriæ, sed multæ doctrinæ, & magni laboris fuit. Scripsit is Hexametros, illos quidem erudita etiam ætate tolerabiles. Utinam ¹ COLA MONTANUS quale ingenium habuit ad dicendum, talem mentem ad ocium contulisset. Sed hunc ambitio absorbit, & inexhausta aviditas magnitudinis falsæ, dum sibi opinionis errore gloriæ fore putet seditionem, atque discordiam ferere, & potentissimos homines falsis criminibus in invidiam vocare; itaque malis initiis orsus, perniciosissimum vitæ genus tristem exitum habuit. *Alexander*. Quæ, malum, est ista tanta ambitio? quæ præclarissimum istius ingenium falsæ laudis cupiditate perverterit? Nihil est enim, ut opinor, incongruentius, quam litteras, quæ aluntur ocio, & usui commodoque parantur, ad perniciem hominum seditionemque convertere. *Antonius*. Sane probe dicis, Alexander. Sed ² ANDREAS BRENTIUS Patavinus Græcis litteris eruditus ostendebat fructus futuros; quos si percipere ei licuisset, & speratam esset gloriam consequutus: sed breve vitæ spatium ingenii amplificandi fuit. Hunc defunctum ³ PAULUS MARSUS quum laudavisset, fuissetque in ea laudatione a multitudine quasi explosus, propterea quod nimia contentione vocis pronuntiasset,

¹ De COLA MONTANO plura Author noster Lib. 3. de Cardinal. *hominem appellans ingeniosum, & disertum*.

² ANDREAS BRENTIUS Græcis Latinisque litteris clarus, Hippocratem de insomniis in latinum sermonem convertit. Romæ immatura morte sublatus est an. 1484.

³ PAULUS MARSUS Poëta fuit, & Commentator. Claruit an. 1485. Ejusdem habemus Commentarium in Ovidii Fastos editum Ven. 1482. atque aliud in Virgilium impressum Norimbergæ 1491.

set, tantum animo accepit dolorem, ut paucis interpositis diebus quum ad animi solitudinem morbus accessisset, moreretur. Is non erat omnino contemnendus scriptor, nec inutilis, & Poëta quamvis negligens, attamen laudandus, ut qui multum natura ipsa valuerit: meministis enim vos, ut opinor, quam magnum numerum versuum sit is solitus dicere ex tempore. Sed grave vulnus nobis fuit, quod nuper ex morte ¹ FLAVII PANTAGATHI ingeniosi hominis suscepimus; qui quum semel se ab inimicorum fraude vindicasset, incidissetque iterum in impetum furentis populi, ab ipsis inimicis est interfectus. Fecerant irruptionem inimici cum armatis hominibus in ejus domum; cædebant januam saxis, instabant ferro; quum ille miser undique fata circumstare, nec jam salutis spem ullam videret, inimicorum crudelitati se præbuit lacerandum. Itaque homo eruditus, diutius si vixisset, declarare potuisset id se in scribendo consequutum, quod ab excellenti ingenio expectari potest. Erat is Poëta acutus, & quibusdam aculeis facetus. Erat in laceffendo, & in respondendo tanta ingenii celeritate, quantam in nullo unquam cognoverim. Is reliquit Trajani Cæsaris vitam, utilem illam quidem, & nobilem. Nec vero ² ANTONIO GIRARDINO honores defuissent,

G 2

nisi

¹ De FLAVIO PANTAGATHO Poëta mentionem facit Author de Card. L.I. pag. 39.

² ANTONIUS hic de GIRARDINIS, aut magis de Geraldinis, ut ex edypo eorundem sigillo apud me patet, Poëta laureatus. Hunc Jo: Cinellius Florentinum appellat; sed Amerinus fuit, vir clarissimus, qui post varias legationes, obiit Marcenæ in Andalusia an. 1488. Ejusdem multorum Operum mentio habetur in Ephem. Ital. sæpe citat. T. XXII. & XXIV.

nisi ipse quoque in medio cursu cecidisset. Contulerat se ad amicitiam Hispanorum Regis; quem sibi adeo, siue morum suauitate, siue doctrina devinxerat, ut facile homo litteris instructus, si longior ei vita contigisset, a Rege generoso, ac potente & opibus, & honoribus sublevaretur. * MARTINUS PHILETICUS quanquam natura erat tardior, non tamen indoctus fuit, & sane utilem operam juventuti præbuit. Sed & oppidana quidem, & minus compta erat oratio; idque acciderat dum se vellet & Poëtam, & Oratorem putari, quum in altero laboraret, in altero parum studii poneret, & neutro excellabat; quod vitium cum in omni re, tum potissimum in his studiis effugiendum puto. In eo quoque genere numerabatur DANIEL FRANCINUS diligens, & sane bonus Grammaticus, in dicendo autem lenis, & fluens, sed qui plus latinitatis, quam nervorum haberet. Neque enim ita facti a natura sumus, ut possimus pluribus simul rebus excellere: itaque in hoc arbitror sequendam esse naturam ducem, atque eo tantummodo eundem, quo ab ipsa trahimur, & ducimur, ut simus potius simplici in genere perfecti, quam nos totos variarum multipliciumque artium studiis applicemus. Sed * BARTHOLOMÆUS

LAM-

* Ejusdem habemus Commentaria in Epistolas, de Offic. Amicit. Senecut. & Paradoxa Marci Tullii, atque Theocriti Idyllia e Græco in Latinum translata.

* En nova de nomine contentio. Paulus Jovius: LAMPRIDIUS (ita omnino nomine) Poëta Cremonensis, quum in Colle Quirinali schola Græcorum adolescentium, insititente Lascare coalesceret, docendi munus suscepit exercitatione perutili; quod argumenta propo-
sita utriusque lingua verbis, & figuris ad mutuam ingeniorum amulationem vertentur: sed crepto Leone, & subito eversis optimarum litterarum studiis, Patavium se contulit, ubi per aliquot annos domi ex collatieia mercede delectorum juvenum Græcas,

LAMPRIDIUS, hospes, Paule, & familiaris tuus, litteris Græcis doctus fuit, sed in dicendo parum exercitatus, totoque genere jejunos, & fractus: ferebatur enim, ut scis, ita præcipiti quadam dicendi cupiditate, ut quum peroraturus esset, vix trium dierum spatium in meditando componendaque oratione poneret. Itaque quum sæpe inter dicendum ea, quæ celerime, & interrupte didicerat oblivisceretur; risum audientibus excitabat. Sed postquam, Paule, in memoriam incidimus necessariorum tuorum, referendi nimirum in hunc sermonem erunt duo municipes tui, ¹ C. QUARQUALIUS, & ² ANTONIUS LOLLIVS, quorum alter Poëma fecit festivum, & quibusdam aspersum salibus; alter etiam ex aliquot orationibus, quas Romæ habuit, multum commendationis est consequutus. *Paulus*. Amice, hercule, fecisti, Antoni, quod laudem meis municipibus tribueris. *Antonius*. Sed de ³ FRANCISCO ARRETINO aliquid dicamus: qui fuit unus doctissimorum Ju-
ri-

& Latinas litteras, majore quasi, quam gloria professus est. Gadius vero de Scriptoris non Eccles. T. I. Lampridius Benedictus Cremonensis Poëta elogio, vel censura notatur ab Jovio, defenditur, summeque laudatur a Toscano, qui ipsum appellat saculi miraculum. Honorius Dominicus Caramella Panormitanus, Michaël Foscarenus, alique Benedictum appellant. Verum Lampridio Bartholomæi nomen fuisse suadet assertio Pauli Cortesii, qui hic ejusdem hospes, & familiaris vocatur.

¹ De CHERUBINO Domini Bartholi DE QUARQUALIIS Canonico Eccl. Collegiatæ Geminianensis plura Jo: Vincentius Coppi in Annal. De eo ita Cortesius de Cardin. Lib. II. pag. 80. loquitur *Lucius Matifcon Celza quum a spe patriatus longissime abesset, promississetque C Quarqualio Municipi meo Janensi, Poëta ut illa aetate culto, si fato quandoque esset ei in Senatoria sella sessitandum, fanum se quoddam paganum daturum, quumque paucis post diebus senatorium locum nundinatur esset, quæissetque ex eo Quarqualins ut aut adepto Patriatu servaret promissorum fidem, &c.* Inter Epistolas Marfilii Ficini aliqua extat Cherubino Quarqualio viro doctissimo.

² ANTONIUS LOLLIVS Geminianensis inter Patriæ suæ viros illustres adnumeratur a Jo: Vinc. Coppio, qui Epistolam Politiani de eo loquentis ostendit; est autem Lib. IV. ep. IX.

³ Floruit FRANCISCUS ACCOLTI Arretinus circa annum 1470. meruitque elogium, quod apud Guidum Pancirolum. Vide ejusdem Lib. 2. cap. 103. de Clar. Inti

risconsultissimus omnium. Nihil est enim litteris mandatum, nihil in artibus disciplinisque omnibus traditum, quod ab hoc homine non sit aut cognitum, aut investigatum. Memoria autem tanta erat & verborum, & rerum, ut omnia, quæ unquam legerat meminisset. * BERNARDUS autem JUSTINIANUS, Leonardi Oratoris Filius, qui nuper est mortuus, natura fuit singularis ad dicendum, & negligentiam latini sermonis tegebat actionis dignitate. Hujus sunt Orationes. Illa Romæ habita, ut in affluenti, & copioso genere, laudabilis. * LAURENTIUS MINIA-TENSIS, qui nuper obiit, quoquo modo poterat & Poëmata scripsit, & Historiam, sed hunc sublimius Astronomia satis sustulit; in quo genere ita laboravit, & præstitit, ut esset ex tota Italia ad eum concursus. Atque is primus ex omnibus Manilium Poëtam ex adytis editum in lucem revocavit. Sed pæne PÆTONUM, & L. CARBONEM imprudens præterii: quorum alter cum studiosus, & diligens, tum bene doctus fuit: alterius nonnullæ feruntur Orationes. *Alexander.* Isti quidem laudantur semper a nobis, & jure laudantur, quandoquidem tantarum doctrinarum scientiam sunt adepti; sed vellem, postquam eos, qui aliquam scribendi laudem attigerunt, nominasti, ut de his, qui hodie vivunt, aliquid diceres,

* BERNARDUS JUSTINIANUS Leonardi antea memorati filius patricius Veneris suæ Urbis nomine an. 1471. ad Xystum Pontificem legatus fuit, scripsitque Vitam patris sui Laurentii Justiniani, item de origine Venetiarum. V. Voff. de Hist. Lat. Huius Orationem quamdam doctissimi fratres Vulpii Patavii nuper edidere.

* De LAURENTIO BONINCONTIO Miniaten. loquuntur Michaël Foscarenus Scaligeri verbis, ac Cl. Vir Lud. Ant. Muratorius, qui primus Bonincontri Historiam nuper inter rer. Italic. Script. edidit. Bonincontrius Manilium primus Florentiæ legit, ut ipse testatur, magno auditorum assensu, & Commentarium in Manilii Libros Astronom. Bonon. in lucem misit 1474.

res. *Paulus*. Mihi vero nihil poterit esse jucundius, quam si eorum hominum virtutes, qui nobis ex facie, & ex fama doctrinæ noti sunt, in hoc sermone celebratas videro. Delectamur enim nescio quo pacto vehementius eorum laudibus, quos præsentibus diligimus, aut admiramur. *Antonius*. Ego profecto libenter vobis morem gererem, nisi jam advesperasceret. Res sane esset novo sermone digna, sed vos, ut opinor, non parum voluptatis cepistis ex commemoratione summorum virorum. Quanquam tu quidem, Paule, quod fortasse hac ætate illustrioribus litteris eloquentiæ studia aucta putes, vivorum magis laudibus delecteris, quam eorum, qui vita exceßerunt: multi tamen laudandi viri, quos in hunc sermonem congestimus, omni nos genere doctrinæ delectare possunt. Nam L. Arretinus, illius ætatis princeps, satis nos delectabit, si in eo amplitudinem, & copiam requisiverimus: nec minus jucunditatis habet erudita illa Theodori Gazæ & sententiosa, & mollis oratio. Jam vero A. Campa-
no, quod lumen orationis, quæ ornamenta desunt? quid Poggio ingeniosa in dicendo facilitas? quid ceterorum præclara ingenia? Mirum est quantum in suo quisque genere delectet. *Alexander*. Præclare intelligo, cur neminem ex his, qui hodie sunt, velis ipse nominare; ne quid scilicet ad gratiam diceres, aut ne forte minuere eorum, quos collegisti, gloriam videreris, si eos cum his, qui vivunt conferres. Equidem de quibusdam sic existimo, ipsos multum in omni genere doctrinæ esse versatos, sed
non-

nondum lumen, & florem Latinæ orationis attigisse; quam tu negare non poteris ab hujus ætatis hominibus, & excultam esse politius, & majori artificio amplificatam. *Antonius.* Quorsum ista, Alexander? *Alexander.* Quia ita hanc turbam doctorum hominum omni genere laudum exornasti, ut multos in opinionem possis inducere, neminem esse hujus ætatis cum his viris conferendum. *Ant.* Peracute tu quidem, Alexander, hanc comparisonem ex me conaris elicere; quam in commodiorem diem differamus. Nam & ego libentissime in eo sermone versabor; in quo gloriari nobis liceat, id esse nuper ab ingeniis nostrorum hominum, vel inventum, vel illustratum, quod mille jam prope annos ignoratum sit. Quare illorum memoriam, quod eloquentiam ex barbarorum vinculis exemerint, quantum possumus augeamus. Hos autem, qui hæc ipsa studia ab illis accepta locupletarunt, tota mente intueamur, ut eorum nutrimentis educati, majora aliquando consequi possimus. Sed nunc quidem surgendum arbitror, & in Oppidum redeundum, ne qua interim e lacu tempestas exoriatur. *Paulus.* Sic prorsus faciendum censeo, nisi quid secus Alexandro videtur. *Alexander.* Ego vero, etsi de his, qui vivunt, aliquid libenter audirem, tamen quoniam tu, Antoni, hanc commemorationem in commodiorem diem distulisti, non pugnabo tecum, sed exspectabo quæ polliceris. Nunc in Oppidum revertamur.

F I N I S.